

武寧縣志卷之二十二

武寧縣知縣滇南李

人物

玉蘊峯清珠藏水潔百里之區江山秀傑其鍾於人敦
龐卓越或勵德修或樹奇節勲業文章同規合轍勒鼎
銘鐘煌煌前列我

朝敷教無遠弗達陶冶羣材朝甄夕別欲勵後賢爰表先哲
慎其蒐討幽潛必察志人物

人物名臣

漢

劉陵豫章艾人和帝時為長沙安成長先是長沙多虎患
陵到官逾月虎悉出境民安其居入為侍中車駕出祀



南郊陵驂乘上升輿假寐陵跪曰陛下萬乘主在輿宜
正容雖早嚴欲寐不當上爲天地神祇下爲百姓觀覩
耶上媿謝曰敬受侍中之言 謝承漢書

鄧通字子淵豫章西平人沈毅有學行官馮翊太守不通
賓客京師號曰鄧獨坐 南昌耆舊志

按鄧氏譜漢高密侯第三子珍國公生子鑛爲南昌
縣尉卜西山鄧城居之鑛子夢秋尉海昏遂家西平
夢秋生民仰仰生通以經術顯明帝時拜左馮翊性
介靜學者稱獨坐先生世居西平卽漢之西安縣也
詳見古蹟

唐

張瑫字大倫祭酒張寧之子憲宗元和間進士任上谷太
守居官嚴正有法度以丰稜見憚後與權貴不合挂冠
歸人謂瑫有父風焉

南唐

盧絳字子華侍郎儁之子南唐時從父開水利有功授將
軍母陳氏葬郭端衝絳廬墓日夜哭不衰時稱爲至孝
至今相傳曰至孝窩

宋

葉顧言南鄉廉村人家貧嗜學負重望天聖五年與邑人
蕭本余規同登王堯臣榜韓琦第二顧言第四唱名時
五色雲見太史入奏詔賜榜前十名得衣緋世傳有一
舉堯堦便賜緋之句累官朝奉大夫

余規字文舉長樂鄉人天聖五年進士累官樞密副使因

廢郭后與呂夷簡議論不合遂引退歸築室西山之麓
種梧成林疏泉灌園以自適後景祐中累名不出自號
石坪先生

陳天瑞字景祥下南鄉人大觀進士官九江太守清操惠
政治行第一紹興閒聞秦檜還越州大將軍曲端見殺
天瑞曰時事不可爲矣遂乞休歸

葉榎字國材紹興閒岳忠武提兵入洪州榎以進士杖策
軍門獻攻取之畧岳侯與語大喜命之隨軍多有裨助
岳甚重之官廣東經畧司幹官後詣闕條呈八事召赴
都堂與時論齟齬遂棄官歸隱卒陪享岳廟著有沉帚
集兄卓字秀實以文貢辟雖授和州教官有才不遇而
卒榎葬南鄉翠浦朝議大夫鄭埜有傳見藝文

湯執中字季權昇仁鄉印溪人少有志畧嘗曰立功中原
垂名竹帛方足吾志入京遊太學建炎閒上書畱守宗
公澤言防禦機要諸務公才之畱置軍中時巨寇王善
擁眾七十萬將犯京城執中陳策夜入賊營諭以禍福
又說賊張用按兵不動宗公單騎馳至遂解甲降及二
寇復叛據淮寧執中畫策大破之奏補沿江幹辦官已
而力辭歸里養親以自遂紹興初岳忠武討李成知執
中名檄執中與冷洙禦之執中同洙弟冲會兵攻城數
戰皆捷忠武手錄軍功真蹟尙藏其家於是執中遂優
游林下不復出矣隆興癸未卒於家

湯邦德字行成家貧苦學登建炎戊申進士初任大冶縣
尉岳侯討李成張用之亂過富川下令具千艘渡江邦

德奉命立辦巖岸侯召慰之曰不謂書生幹濟乃爾以才遷長沙令有廉名宣撫使鄭剛中辟爲幕諸司皆以京秩交薦適有旨令湖南漕臺調糧百萬斛詣湖廣總領所犒軍邦德單車就道晨夜馳驅蒙犯霜雪倍道兼行踰旬達武昌糗糧無圭粒耗岳軍食足邦德督運之力爲多以功轉奉議郎積勞疾作卒邦德居官仁恕緩催科寬治鑄苛徵除芻糧冗費民皆德之歲常守俸粗給嘗正色却吏漕私饋曰吾不忍食民脂膏以自潤稍暇喜吟咏笥儲書數千帙而家人不免饑寒卒之日唯衣衾枕篔而已妻子畱任所不能歸邵州太守聞訃厚卹之始得還里吏部宋翰爲廉吏傳以表之邦德性簡淡無競進心嘗謝潭帥有云夜醉長沙酒不辭轉餉之勞日食武昌魚初喜及瓜之代行脫選調入綴班行其志不急於仕進如此

按通鑑紹興元年三月李成將馬進走筠州岳飛擊敗之進以餘卒奔南康飛夜引兵至朱家山斬其將趙萬五月張俊引兵渡江追李成至蘄州張用復寇江西飛招降之據此則湯執中之禦亂當在三月奔南康時蹂躪武寧爾湯邦德之辦舟當在五月岳忠武用兵時也

周友賢號松庵嘉定戊辰進士歷官敷文閣學士爲人簡重寡言笑遇人無少長必以禮少好學與任希夷友善及登清要希夷芒屨野服終日相對不覺其爲貴人也友賢傲歷中外政績甚著立朝勁直敢言然不爲矯激

沽名期於有濟遇事多所匡正而眷注不衰第三人友
直友諒友能從第四人友信友仁友聞友端並以文學
顯仕輒有聲寧宗手書棣華二字以勝其堂理宗朝詔
祀友賢於鄉賢祠

汪剛中桐林人靜王焱後裔也嘉定戊辰進士累官侍御
史立朝侃侃無所隱避權要憚之時論以爲有古直臣
風

葉履和南鄉廉村人性厚重兒時言動如成人事父母孝
爲學以躬行爲先登紹定己丑進士與太史徐經孫交
規勸諄切往復不厭官衡陽時決疑獄多所平反尋通
判寶慶卒於官經孫有墓表見藝文

周汝翼字仲良學士友賢子也官國子司業歷知荆淮浙
東西宣撫使初知荆淮值水災流離失所築城壘堤民
困得甦卒贈朝議大夫子應合爲名臣

冷文英字子華淳祐甲辰進士學識文才冠絕一時嘗以
天下之變中古以前至秦而極中古以後自秦而始乃
作史纂始於秦以表禍亂之終始提綱絜領獨關議論
義類森著爲古來史氏未有之書有序見藝文

葉惟華字仲實廉村人淳祐進士授江寧助教擢知將樂
縣廉介自守躬課農桑教民務本咸德之及行貧不能
治裝裹糧追送者幾萬人遷靜江倅政績甚著考滿當
調會省試靜江訕嚴刻待士不以禮惟華與之抗帥劾
華越職遂罷歸咸淳中翰林承旨馮夢得參知政事章
鑑列薦於朝徵爲朝散大夫未赴卒於家

邢凱號坦齋長樂鄉西坑人嘉定甲戌進士累官吏部侍郎致仕歸築豐岡書院儲書萬卷日與文人韵士飲酒賦詩以自娛所著坦齋通編筆衡若干卷通編多散佚國朝四庫全書從永樂大典中集爲一卷筆衡僅見李時珍本草綱目有傳見藝文

周應合初曰彌扈廷見時理宗易其名字淳叟友賢孫淳祐庚戌進士授江寧府教授尋召入爲實錄院修撰景德閒充江南東路安撫使司幹辦公事奉勅撰建康志五十卷井井有法志乘家皆宗之旋徵爲御史未拜卽上疏劾賈似道貪庸誤國上怒謫通判饒州復罷主管華州雲臺觀使似道敗擢直賢院學士會疾篤未赴而卒初號洪崖處士有洪崖集後謫居築園鶴溪上又號溪園先生著溪園集若干卷子四虎驥龍鳳皆有聲驥尤著邑人盛樂有傳見藝文

傅瑛字文英柘坑人年十九中寶祐甲寅進士累官兵部侍郎時宋祚將移國勢傾側而賈似道專權溺職中外切齒累疏劾之不報似道中以他事竄貶潮州司戶尋卒

傅蒿字文蒿瑛弟年二十二中開慶己未進士官刑部郎中遷禮部度宗時賈似道於西湖葛嶺大營第宅日與姬妾飲博自娛四方警急匿不以報蒿曰事勢至此吾安能與似道同朝奮激上章極言其奸邪不可倚用似道大怒斥罷之卽日拂袖歸里

元

周天驥字德之應合子生有異質經史百家一過日終身成誦七歲能詩賦應神童舉入元薦博學鴻詞授太和縣主簿改授徐州司戶以連帥薦遷江淮參軍贊畫軍政屢著異績再遷至吉梧饒三路總管以平廣南功加兩浙都督入覲世祖奏對稱旨拜江西行省參知政事尋除左丞佩金虎符進封豫章郡公驥天才殊特學問該貫謝疊山過武寧深爲歎異居官簡慎值喪亂之餘一以撫循爲務尤能與士卒同甘苦故士樂用命所至輒有功少讀書北峯泉石清越後人名其山曰神童山立廟祀焉

明

聶以大字克俊昇仁鄉人中洪武甲子舉人乙丑廷對擢高第官戶科給事中遷監察御史巡按陝西時海內初定萑苻嘯聚所至皆然而關中尤甚二千石不能治上以爲憂以大至檄土人爲嚮導得其渠輒誘至之開陳利害賊多就撫其負固者置之法羣盜掃跡關中以治入奏改按湖西湖處山海閒素爲賊藪聞以大至悉竄去劾藩臬郡守不職者數人墨吏多棄印綬走尋遷湖廣按察司僉事楚壤界連滇南筇笮諸酋巢穴山嶠反側無定邊吏無敢動以大先事候情絕其萌芽郡縣安堵已又改浙江僉事以疾歸卒年二十七無子弟以和永樂甲午舉人官直隸知縣姪思聰官姚縣知縣改三原縣知縣併有治聲

陳銘字自新坊市人由國學官充州寧陽縣丞調處州松

陽縣丞爲人剛方廉謹所至輒有治聲祀松陽名宦年五十七致仕歸家居四十載門庭蕭然一爐一榻與子姪講學論文非公事未嘗謁當事當事皆敬禮之卒祀鄉賢

萬廷彩字杲齋山前人幼沉靜不妄發一語稍長從吉水許幼公學刻苦嚴厲作無逸箴以自警宏治乙卯舉於鄉以會試乙榜授河南鈞州訓導遷南京國子監學錄正德初用臺臣薦徵拜御史值江彬等用事忌廷彩抗直出補福寧州知州轉延平府同知以治行第一擢南京刑部員外郎尋遷禮部郎中時世宗入繼大統廷臣議禮楊廷和與張璁相持久不決彩深然璁議璁至南曹相與討論彩博洽典制多所發明及璁等上疏彩獨不署名曰此議發自張君吾何有焉璁等既以議禮稱旨相繼柄用彩絕不與通及立世廟加尊號嘆曰本以維禮而反壞之張君不能無罪矣久之遷浙江布政使司參議尋改參政督理糧儲黃冊嚴出入正衡概宿弊頓除浙民賴之擢湖廣布政使司未赴辭疾歸卒祀鄉賢

方孟縉字朝儀號鴈里塔溪人中嘉靖壬午舉人乙未第進士授刑部主事時貴戚張延齡驕縱陰蓄門客謀爲不軌事覺問者多避私不以實聞上命縉覆勘縉曰張氏大逆苟失出何以示天下竟置之法初江西吳鎮爲水兌旗軍追索無狀縉出巡漕政按其事請兌豫章從之至今稱便擢刑部員外郎出爲浙江按察司僉事道

經山東見民輸貢京師者不死於道卽死於法縉具狀以聞得免其役比蒞浙益勵於政適倭寇爲患晝夜調遣靡寧積勞成疾遂卒縉性至孝事母左右盡歡每外遊涕泣不已母沒廬墓三年哭甚哀所著有鴈里殘稿祀鄉賢邑人盛謨有傳見藝文

張機後街人由貢授永寧訓導擢益王府教授時諸王驕縱視官司如徒隸機入以長揖見王不悅機曰機王府教授也若膝行匍伏何以爲世子師王意解乃躬起慰勞益加敬禮及瓜乞致仕王畱之不可贈以詩有關西清望動京華及志同疏廣無金散之句至今有樹德堂攀龍附鳳二額存焉

人物宦業

宋

冷用端徽宗朝上萬年書畧云挑汴則杜黃河取洛水挑濶則起大滎入淮泗灌濟無覆沒之患商濤無湍怒之憂上嘉納之命下而卒用端宣和癸卯免舉

冷滌字彥澗紹興閒以邊功補迪功郎又從團練使劉紹先討吉寇陳和陷陣轉戰而出有功授知揚州天長縣事

葉爽廉村人紹興初典兵佐縣官補進武校尉岳忠武經畧中原爽居戲下參佐軍事討楊么於湖南轉成忠郎女真僞立劉豫於河南抗拒王師爽又獻策徵討承制補宣義郎江西宣府幹司官未竟其用而卒

莫伯符乾道閒爲吉水主簿勸農營田世享其利民尸祝

之遂家焉見吉水志

明

張良興安樂鄉黃陂人由貢士任北徐州同知理漕務報最屢有褒語徐故瀕河民數患水良興築堤疏濬沿河數百里均賴以安徐民至今德之

汪伯亮坊市人少穎異嗜學有宏才由永樂貢士官至刑部主事剛介不通私謁一時咸敬憚之蒞事兩載落落寡合致政歸里囊橐蕭然

鄭志海卽洪慶順義鄉人洪武二十八年由人材初任建德縣知縣改任武陵縣知縣所至寬惠有聲年六十乞歸帝重其賢永樂元年十一月賜以敕書

張天仁字元德坊市人由貢士授蘭溪主簿有政聲迨署縣事會大旱天仁疏數事自責露宿齋戒爲民請命雨大沛爲諸生時端重嚴謹以禮自持危坐終日不懈人皆以爲迂而教諭韋熙獨愛之妻以女及沒與熙並祀鄉賢

彭鳳儀字雲山太坪人嘉靖閒任潮州府別駕時潮州海豐寇爲民患鳳儀至反覆開諭且撫且禽寇感泣渠魁俯首就降餘黨悉散常攝潮陽縣有獄久不決訟者以金進鳳儀曰事果直吾爲天子吏何可干也立還金卒雪其冤

潘儻號南吾北鄉南臯人嘉靖己未進士初授建寧知縣改蘇州府教授尋通判開封會河決屢治弗效儻請部使陳治河十策部使上其議許之卽授河務儻拜命慷慨

慨負薪輦土與廝役同苦辛寒暑不懈晷月水循故道
民賴以安建生祠尸祝焉二年改知道州尋致仕歸家
居謹飭喪葬一以古禮痛闢佛氏常受業余弼門弼死
爲刻詩文行世儻子元齡開運孫士學並以詩書世其
家元齡尤博瞻

萬曰軾字養初江陰鄉山前人中萬歷壬午解試初任東
流縣知縣東流瀕江素患盜軾捕獲渠魁數人置於法
醜類盡解尋改陽江復移鄖西故有礦時以權璫領採
權事鄖民苦其稅流徙旁縣軾捐貲七百餘釋民所負
力請減徵鄖民復聚擢定蕃州知州陳馭邊六事當道
嘉納之攷治行者稱爲黔中第一人卒祀鄉賢

呂子登瓜源人萬歷貢士官蜀保知縣下車旬月出入戴
星慨然以古循吏爲已任當道交章論薦期以大用積
勞疾作卒於官

陳耕字莘五坊市人由太學生授南京兵馬司副指揮使
改宜興縣丞宜興時有富商以事囑耕耕不可商瓶中
爲食物奉耕耕揮之使者曰金也耕怒卽召其人還之
生平廉介大率類此

盛宗齡字長庚南市人有夙慧目光炯炯能於闇處作字
博極羣書爲文恣肆洸洋落紙數千言立就同輩憚之
與邑人潘元齡林維翰余長祚號爲四傑萬歷丙午以
副榜貢京師官浙江麗水訓導署松陽縣決疑獄省浮
徵甚有政聲巡撫陸直布政楊罔卿交章論薦以嘗忤
璫格部議不果尋遷大庾教諭終撫州府教授齡好獎

掖後進所至學者如雲族子士淑少苦學潛思頗沉累
既從遊日令放意山水恣肆闢岩遂大放其辭磅礴不
可窮其善開引如此所著甚富皆失傳弟運開子彌願
從子彌振皆以文學著名

張嘉猷字颺廷

安樂鄉黃陂里

人性溫厚行已芳潔學者多師事

之崇禎初以貢任臨川訓導與艾東鄉諸人講學著致
知力行二篇行世復任零都教諭祀名宦遷湖廣九溪
衛教授棄官歸

國朝

張元會字貞元

安樂人

順治辛卯舉人授湯溪知縣下車

邑大旱士民告災元會輕騎履畝得其狀上請停徵復
請減比年稅之十三康熙甲寅逆耿據閩爲亂湯境西
南通閩頑民響應紛不可詰元會除戎器練鄉勇拮据
戰守僅保空城而叛將葉日生以

本朝劄禽賊自効實懷異心聚黨數千入縣迫索供億蹂躪
居民眾憤甚元會陽應其取密聞金衢諸帥以大兵至
竟禽之邑朱姓者聚族山谷閉有祠祀文公數爲賊據
帥欲焚之元會力爲請祠賴以存湯溪當金衢之衝浙
西告警親王統大兵駐金華總督李將軍賴統大兵駐
衢州戎馬絡繹飛檄星馳元會宵旰屏當贊畫軍政屢
著勞績督撫大臣交章論薦卽擢元會知金華

詔下元會卒子鵬扶旅櫬歸囊橐蕭然時論高之

徐月吉字元功號泰庵

安樂小港人

幼孤流寓江左由營伍授

千部順治十一年從昭勇將軍楊捷征小梁山克之授

明威將軍尋征福建漳泉廈門直入寇營獲其渠帥以歸克復數郡康熙八年從大兵勦臺灣戰江陵旋駐金門屯陳倉大小二十餘戰身無完膚兵罷事不以聞康熙二十三年

詔征雲貴身冒矢石連拔一十九砦以功晉左都督署陝西寧

夏花馬池總兵事康熙丁丑

大駕親征噶爾旦月吉爲先鋒大克之晉

封榮祿大夫尋致仕歸月吉出身營伍戮力行陣轉戰數十年

功甚鉅而賦性抗直與世齟齬轉官都督而月吉老矣卒年八十餘邑人盛元績有傳見藝文

盧達字瑞芝長樂鄉松村人年五十猶困江省康熙十三年江西有土寇之變諸郡多事達以造戰艇能入行伍授百戶從征四五年殲賊復城功最多江西以平晉昭武將軍黔滇告警隨簡親王部連奏捷至鴨池河無舟造筏呼風而渡賊望見之不戰走雲貴初定馬寶部尙寇四川達請往偵得其虛實捲甲而蹙之賊隨滅班師策勲官拜左都督管湖廣施州營遊擊事越五年晉

封榮祿

大夫達起行伍老乃得官出入於矢石閒者近十年大

小五六十戰未嘗敗北七十致仕又十年以壽終孫愈

奎由武舉官南湖營都闔揚光斗張望有傳見藝文

余天亮字彩臣號洪崖

安樂橋頭

人康熙丙子舉於鄉時與寧

州舉人胡從憲同公車北上從憲死亮昇其喪以還授湖廣巴陵知縣清廉慎重革漕弊邑民大受其惠至今戶祝焉邑人余光廷有傳見藝文族兄天成字順則碧

田人康熙乙酉歲貢授龍泉訓導嘗講學青牛洞取朱子或問書與門人問答天亮從之遊飲食教誨半倚於成云

盛際斯字成十號青崖坊市人性孝友少避亂山中晝則涉溪澗擷蔬果以奉親夜則從伯兄口授周易母病不能食亦不食母飲粥始飲粥不解衣帶者四十日夜亂定讀書玉清宮窮經史百家刻苦忘寢食遊京師不遇以選貢授樂平教諭與諸生講學飲月軒嘗曰四子六經不出日用舍親義序別無學也有不率者委曲開論往往引咎自責人皆感興後遷吉安府教授致仕歸年七十卒邑令鄒應元有傳見藝文

余文梓字季良號山翁上郡人少孤家貧母王氏教以經書深自刻厲閉戶累歲學乃大就時當喪亂之餘士風闕茸梓與邑人盛際斯造爲高遠奇肆之文人駭且笑及高璜督學並見推獎一時名噪江右由歲貢選萍鄉縣學訓導年且老既至官以古學相講磨砥礪名節風氣大變期年乞休歸每訓其子曰讀書無益於世雖萬卷何爲也子輩方年少而予已髮凡予所爲皆關係民物事不以休於廣文爲憾也初潭埠瀕河夜半水大至衆悲號徹天梓編桴率子弟家僮悉救出之凡數百人邑令鄒應元有傳見藝文子騰蛟成進士有文名螭增貢生孫世蘇登賢書

盧浙字讓瀾號容菴長樂鄉人少慧好學以明經衛道爲已任方諸生時與邑處士張望選士王子音輩爲性情

文字交既成進士授戶部主事歷官至太僕寺卿中間
巡視濟寧漕務漕船先期抵通當事能之督學河南與
諸生論文必兼講學以六條訓士併作十字箴一時士
風丕變又歷任言官本學術爲經濟熟悉古今故實遇
事敢言嘉慶年間喚咭喇國遣使入貢使臣傲慢無禮
已奉

旨發還貢物逐令回國不治其罪浙疏請責懲通事援引宋
時高麗貢使驕橫蘇軾使人責押伴等又於闐貢使驕
甚陳希亮持符嚴誠譯者二事證之

京城風沙示警

詔求直言浙上疏以追捕林清餘黨累及善良爲言得
旨嘉獎自河南旋

奏請以湯文正公從祀 文廟得

旨允行浙固嗜學尤好精研易理所著有周易經義審八卷
說約一卷又著有讀史隨筆二卷爲學須知一卷散體
文五卷制藝一卷行世旣歿邑紳士臚舉其生平學行
經濟著述稟縣轉詳奉 部議

奏請

旨崇祀鄉賢子鴻翥河南懷慶府經歷鴻翹丙戌成進士由
翰林院庶吉士改刑部主事鴻翔監生鴻彬西城兵馬
司吏目孫正熙直隸靈壽縣尉光吉舉人大挑一等分
發四川候補知縣現署江安縣事

人物 儒林

晉

俞益期豫章人性氣剛直不下曲俗遠適交州與豫章守
韓康伯書論檝榔以寄况著交州牋傳於世論載藝文
按晉地理志太康元年豫章郡統縣十六改西安縣
爲豫章縣後人混以豫章爲南昌不知十六縣中本
有南昌而西安本屬武寧漢晉人物多亡逸今錄其
可據者從晉史訂入

宋

余錡長樂鄉洞溪人以鄉薦授大理評事負氣節不能俯
仰人與大臣不合棄官歸淳熙中聞朱文公講學白鹿
洞往從之益折節讀書累歲不離講席與周謨呂燾同
建修江書院燾去從者亦散錡獨畱如待燾時後竟沒
廬山葬女兒港

楊三益字子直澧溪人嘉定甲戌進士畱心古學推一時
作者邑中碑版文字多出其手嘗從朱子講學一日同
憩華蓋石朱子爲刻名石上有吾與點也之語可想見
其風裁云

冷應登字季庸寶祐癸丑進士博學能文知時不可爲深
居山中著書自娛嘗集朝野中外得失出入有關於治
亂者託之悲歌以存一代遺事曰樵唱錄宋亡年已七
十餘時冷氏文人甚盛唯日與櫟園諸君子談詩論文
優游自遣而已

冷三德字子宣鄉貢爲人孝友尙義寶祐二年乙卯讀書
東湖書院師王允文卒不能殯三德哀不自勝教授劉
子高感其義告之運使翁甫歸葬之

正宜縣志卷之二十一
葉點字明允別駕履和之子性廉靜博覽羣書淡於進取
一時名人皆願與之交點落落也獨與謝方叔友善方
叔亦深器之理宗朝上保淮蜀策特授進武校尉撫州
崇仁縣監稅不赴兩貢漕舉再中潛藩恩舉侍從臺郡
以遺逸列薦赴省不出旋薦史館又不赴以右丞相章
鑑薦徵著作郎卒祀鄉賢

鄢玉庭字德簡建溪人浙江秀水縣丞與吉水文文山善
文山書益齋二字以贈因自號曰益齋時值宋末棄官
歸隱築別墅於建溪堂曰富春有詩云閒雲不礙青山
好物外風高心自清遂終身不出卒於元至元葬鄢溪
之西

冷應凱字才夫昇仁鄉人咸淳貢士宋亡隱居不仕性孤
介寡交遊從饒雙峯讀書白鹿洞深契誠明之旨灑然
自得元初宜慰使李珣薦於朝累徵不起嘗講學龍崖
因號龍崖先生南昌熊凱挽詩有云學道一燈來鹿洞
斯文千古屬龍崖所著有龍崖集十卷今失傳

元

邢以忠字天弼西坑人少從宋進士冷應元學善屬文入
元與冷應登起予諸公往復聯榭所爲文出入六朝唐
宋翹然自爲一家中延祐乙卯進士爲台州教授遷興
國通判子孫遂家於楚

冷起予昇仁鄉人博學強記日覽數千言皆成誦尤喜旁
搜凡山經異苑虞初諾臯諸書靡不討求擇其事與詞
之尤瑰異者裒積成編號曰談塵有翫齋益瓴雜抄諸

武寧縣志 卷二十一 人物 四百五十八
目頗盡說家之奇時人爭傳誦焉仕元爲建寧路儒學
提舉自號櫟樹主人所著有雞肋集四卷櫟園談塵八
卷今亡

潘必卿字國相南臯人至正閒以明經任衢州路教授嘗
師事吳澄得程朱要旨悉以所學牖迪後進每與諸生
講西山大學衍義精神滿座聞者感發翕然以興久之
不忍其去曰先生歸吾徒其何所賴遂留於衢性至孝
迎父文江公就養色笑承歡如嬰兒之慕不衰以衢俗
醇厚且爲聖裔及陸趙二公僑寓處乃結廬於鄉後人
名其里曰孝義

冷同孫字則大義門人博通經籍淡於仕進所著有傲帚
集廬陵龍仁夫序其詩曰余哀畏寒擁爐讀此落葉空
窗居然生意其見重當世如此序見藝文詩今亡

按龍仁夫字觀復博學好古學者稱麟洲先生

張淵字濟川元至元閒任礪老茶局大使轉安慶路總管
經歷世亂解印綬歸明太祖定鼎金陵時知縣馬植造
廬請曰今上御極海宇一新君猶得優游巖穴乎淵笑
而不答以博學老成薦淵徵再至不起閉門教授遠近
從遊者數百人

明

韋熙字德昭坊市人正統六年舉人性狷介學以敦行爲
先時張天仁貧無以娶熙以女妻之有汙令子求受業
其門以厚幣爲贄熙辭不受令有慚色爲諸生時歲儉
不能舉火鄰人代爲鬻羊可得浮值熙聞斥止之其細

行必謹如此仕濟陽教諭解組歸田貧如故卒祀鄉賢
余用江上都人與永豐羅倫講學南昌晚結屋柳山深求
濂洛之旨郡縣累辟皆不就天順元年石亨聞其名薦
於朝與吳與弼同徵弼起應聘用江笑曰亨欲令我出
其門耶乃辭以疾成化中詔舉賢良方正時倫初入翰
林力薦江可大用既至京陳時務十策稱旨將官以宮
僚制未下會大學士李賢奪情視事倫疏劾賢上怒謫
倫提舉市舶江上書辨其枉且言賢忘親違制無以風
天下賢銜之放歸所居地高亢憂旱江鑿渠引溪水輸
灌至今賴之

李春瞳字曰卿號柳峯坊市人隆慶歲貢嗜學能文與金
谿高應芳胡龍川諸人相友善讀書白鹿洞時書院學
田久被侵隱瞳與同學謀復之師事方孟縉方卒於官
貧無以葬瞳經營殫力營葬如禮春瞳卒高應芳表其
墓見藝文

盛應律字元坡羅瑕人少穎異日能誦數千言年十五補
諸生與新建李長卿靖安陳迴溪輩結榭會文時號豫
章八俊最後從章斗津先生讀書白鹿洞研求理學宗
主敬之旨遂焚其少作爲文以理識爲主由萬歷恩貢
授湖廣興山知縣有惠政及歸遮道祖送者至數千人
按李長卿名鼎天資瑰異援毫風雨馳驟咄嗟數千
萬言章斗津名潢南昌人構洗堂於東湖聚徒講學
又主白鹿洞書院

余長祚字靈承弼子八歲能詩有神童之目年十二補邑

諸生以才行貢入太學讀書南廡耻謁貴要落落無所
遇遂歸從父講學賓陽庄益恬淡不樂仕進大學士張
位奇其才數引薦累徵不就長祚風神蘊藉喜愠不形
淵然莫窺其際獨好爲詩日可數千言跌宕恣肆有長
慶大家風豫寧四傑長祚其一也所著皆失傳

按柳溪父子詩文俱已授梓一時稱盛板藏省城余
家巷懼明末兵燹畧無存者遍爲搜訪不能得良可
歎也

林維翰字康侯坊市人善屬文尤長於詩與同邑余長祚
盛宗齡潘元齡友善時稱豫寧四傑庚午以副榜貢太
學祭酒劉曰寧深器之期以大用後見知於烏程朱國
禎會修烈朝實錄薦翰有史才徵書再下不就晚年絕
意科名日與二三良友講明實學務爲有用凡兵刑禮
樂漕務河道海防邊備以至陰陽聲律地志釋典無不
諳練精通一時學者無識不識皆知有康侯先生兄維
藩字介甫與翰齊名

陳以綬字士章坊市人風節峻厲不妄與人交人亦畏避
之然喜汲引後學常立豫章大榭與同邑林維翰盛宗
齡余長祚馳驟議論爲古人之學邑風氣爲之一新崇
禎乙亥以選貢遊京師官彭山縣尹卒於官子孫家焉
余學優字軍柱上都人少有異才博貫經史尤精研性理
旁稽刑政歷律戰陣諸書期於有用與李頴講學南昌
之澹臺祠遠近從者百餘人崇禎中與邑人盛德輝並
以幹國全才特旨辟召聞周延儒復入閣俱辭不赴晚

居石坪治易洞挾隱奧學者宗之稱石坪徵君子文周
邑庠有儒行

按李頰字宏明豐城人以至孝聞萬歷丙午舉人

國朝

喻學儒字女爲鳳溪人性醇和好讀書不屑屑世故與人
接藹然春風無賢愚皆盡歡登崇禎丙子副榜順治丁
酉歲貢淡於仕進以明經終司理盧圖龍幼孤家甚貧
儒一見其文深愛之招之就學卒以文行著名儒友胡
光斗字仲乾貢士門人胡文定字次安亦貢士並有古
風讀書以力行爲先教人不急科名皆得力於學儒也
張居山字少男南嶧人邑諸生少魯鈍讀書刻苦寒暑不
假寐已乃大悟通山孝廉謝廷樹一見奇之曰此真學

人也授生徒一以朱子學規言笑衣冠凜然如古人居
母喪日夕涕泣哀毀不自存見者太息性闢佛老南嶧
處縣西北俗尙鬼山所過有淫祠必燬之僧巫見山往
往趨避曰是燒燬神祠者不可近山能詩喜遊眺有足
疾管制小車陟巒岫轆轤上下爲坐遊之樂所居有七
峯相對終日吟咏自號七峯學者稱曰七峯先生

盛謨字斗挹際斯仲子也性狷介不能諧俗年十七補弟
子員十九歲餼於庠卽有志爲身體力行之學初武寧
喪事喜用僧巫謨力排之一以朱子家禮爲法風氣一
變作文務有程式不事浮靡與弟鏡樂討論一堂淵源
悉謨所指畫分宜林有席自數千里外致書字雲樓曰
字雲先生講學一日卽爲學者一日典型而謨亦以師

道自任語言嘖笑不苟人皆憚之從之遊者幸以根柢能文章爲名下士邑令鄒應元以志乘藝文屬謨謨悉力釐正潤色爲多乾隆己巳臬憲黃公慕謨名以經學薦辭未赴旋官安義司訓著課士規以讀書立品爲先縣尹德公一見尊禮之尋以疾卒於官一時有耆儒凋謝之嘆

盛鏡字于明號止水北鄉人同懷皆穎慧而鏡尤沉靜父際斯督課嚴兄弟益角力以進學成修政於家冲和恬適道氣盎然與人講學惟保性真行素位爲要親炙者客念頹消時仲兄謨季弟樂名滿天下高士多造廬詩文酬唱各出所長偶得鏡言羣俛首服有和阮詩鉛山蔣太史讀之書後有云習靜窮山中庶幾見物理心清

夢恬淡吐語絕泥滓又云忽誦于明詩纔知有生樂又贈詩云淡逸阮嵇儔力學得其養負耒田疇閒誦經聲琅琅寡營慎交遊心鄙太邱廣時以爲知言著有寄軒詩鈔子牧字遠臯文思超邁頃刻千言詩賦多膾炙人口庚寅舉於鄉惜年未四十而卒孫儀號定帆性恬靜工詩文有祖父風早試不遇隱居教授著有定帆小草張望字樓壇號閩榻北鄉人少失怙奉母以孝聞束髮讀書卽耻爲俗儒之學旣不得志於有司遂茅屋清流坐於樓山之下講道論學啜菽飲水晏如也通曉世故無所表見每於論古處發之從之遊者開導陶鎔隨材染琢多成偉器南豐譚古愚中丞撫滇時特賞書幣屬訂經史鈔紉芳齋文集書成酬以玉章端硯謂以此比德

錢塘費文恪公致書有云嘗披手著又佩躬行不特文
追唐宋以前人尤不在秦漢以後古愚亟稱之心言又
加詳焉謀面或俟將來而心儀吾閩楊者蓋十餘年於
茲矣及卒分寧萬文恪公輓之所以推挹者甚至其爲
鉅公引重如此著有閩楊文集淹戩盪七觚鯁花圃詩
鈔聲韻母子圖井下制藝古今醫詩若干卷子守正國
學生文行清高有父風

人物文苑

明

盧由跡字立宇楊田人少有大才名能詩文與新建洪陽
張位善每相集則傾倒淋漓淹旬月而不能別洪陽旣
貴舟艤饒州適跡父客病謀舟覺爲武寧人問曰而知
盧秀才立宇乎曰吾兒也乃大驚扶其入舟敬禮之載
歸洪州寄詩送還有曰古道伊誰問窮愁只自知其見
愛重如此跡姪相幼孤而慧甚愛之相患鼻癰甚危醫
者云吮之乃瘳家人有難色跡曰苟可生吾姪又何難
焉吮之相果瘳而跡染疾以卒所著詩文悉燬於兵不
傳

聶如忠號禹門昇仁鄉人少不好弄喜讀書日記數千言
弱冠下帷南州六經子史先秦西京以下無所不通豫
章諸名彥皆心折之時侍郎羅朝國亦在榭中相得歡
甚所爲古文辭奇甚人讀之至不能以句又博取外家
史氏有不合者手一編出語第如章相講究得其義則
解頤而退禹歷壬寅貢京師補太學每課藝輒冠六館

大司成黃教庵奇之然竟不第卒無子有傳見侍郎文集

盛彌振字抑之南市人天啓丁卯副貢少從伯父宗齡學齡督之嚴稍長文益奇齡甚愛之嘗語門人曰吾家阮咸不免同甫習氣然故是英物明末諸文士結榭開講聲氣烜赫振閉門掃軌深自韜諱各榭移書招致終不應獨與同里余學優精求易理往復商確至老不倦邑之治易者皆宗之稱爲二家易族子士淑亦以治易顯潘希譔號靜齋伊山人性好學匪書甚富生平足跡不履縣城築園伊水上種竹千竿爲淇園自號淇園先生王國珽江陰鄉人博資羣書慨然曰司馬子長足跡滿天下吾促促鄉里何以廣其學識遂負所有縱遊南北所至名人文士把袂交歡而珽名大噪著有壯遊錄崇禎末以濟國宏才舉世亂不得用

李善衡櫻田人素有文名尤精易學崇禎末羅明甫盤踞田此小抗則焚殺無留鄉里苦之聞衡名欲至幕下使人諷諭衡曰吾秀才也豈可從賊遂力拒之夜著卦知不免盡室逸去明日賊眾圍屋無所得而還

國朝

張仲友字大生後街人性明敏從伯兄卿雲授章句有風慧時以神童目之年十一補邑弟子員手一卷不釋爲文不起草及長軀幹魁梧喜議論慷慨自負兩中副車一領歲薦以次授贛州府學訓導在官嗜學不輟虔人士咸宗焉

陳六奇字元伯坊市人少爲諸生有俠習與張安世盛彌科杜棟輩謀攻逆將鄧雲龍聲振一時人皆稱爲義士子良謨字文緒性和易不露圭角人無賢否樂與之近幼善書濡墨伸紙日不暇給年六十餘猶慕蘭亭小楷及洛神賦斌媚妍好諸工書者多師之爲文醇正不尙雕繪丙子己卯兩薦不售以歲貢終孫亮彥嘉彥有聲庠序而亮尤慷慨能任事凡興廢皆與有勞焉

余志明字五瑞羅坪人順治甲午選貢旋中副車主司周通政之桂深器之延主西席一時大老名流爭相結倡和甚盛留都門者凡八年通政偶使婢侍茗卽不懌辭歸邑令馮其世尤敬愛之先是其世與志明善選授武寧因詣訪焉志明詳告以土俗民情無一語及私者其世心與焉比去始宣白於人人益服其品誼之高云

蕭起鳳字德摧鳳口人性豪邁不修節目鄉里稱爲狂士然好讀書尙氣節遇事所不可當權要亦力爭務白乃已尤喜攻詆佛氏授徒大巖寺雨雪久不止薪盡從者有饑色及暮鳳笑曰但假僧斧薪可得耳詰且積薪委地視之皆羅漢象也縣令史偉性峻刻遇士多傲慢會監司按部至縣鳳進謁面數史不職十餘事史屈謝後不敢復斥士鳳起單寒中以文章自雄好獎勵後輩邑名雋多出其門從者張元第蕭露讓尤有聲元第字祖嶷下泝人少穎敏有才文奇肆日能數十藝爲詩清矯得劍南之遺佗傑不遇卒年三十七露讓字建九瀟灑不羣喜爲古文辭尤長於駢體揮毫立就流麗可愛與

李蓮雲最密二人皆喜詼諧每飲酒狂吟以古往今來
爲游戲語皆新妙聞者恬曠

洪文機字豹臣號抑庵中村人穉時見諸兄入塾輒自就
師受書日兼諸童課數歲爲文灑漫師驚異謝去與兄
文偉益攻研而文日肆初試補弟子員凡冠軍十餘試
諸學使延入署衡文悉倚任之外郡經文機擢拔者多
顯達致大位而文機尙爲諸生年逾四十始舉於鄉人
皆惜之文機淡然若浮雲一赴春官後唯對山獨飲綴
文賦詩以自適中村人文疎濶自文機以文學興灌注
旁薄如泉達焉子詔論孫遇舉從子崖後先並登賢書
人皆豔之文機曰讀書非徒博科名諸子輩亦自相循
襲聽之而已其恬靜如此卒年七十邑令鄒應元有傳
見藝文

劉祖陶字漢哲號月堂魯溪人生而愿樸好讀書往往寢
食俱廢雍正壬子與甘雨施張應遴同舉於鄉五上春
官薦而不售以孝廉終陶事親孝親沒遇甘旨輒以不
逮存爲憾兄翁怡怡無所忤雖義所必爭亦平心靜氣
婉婉焉若有所商者自奉節約子婦非婚慶不得御統
綺卒年六十有四學者稱爲魯泉先生

盛樂字水賓際斯季子也幼奇慧四歲能辨四聲七歲能
詩十一歲通經史諸子百家與兩兄謨鏡並以詩文興
一堂之上兄弟爲友朋角力並進人稱三盛乾隆元年
禮部侍郎王紘以博學鴻詞薦同余騰蛟應
徵不第當路欲畱之以母老辭歸益沈酣詩文縱橫上

下所至莫不傾倒與太史李應熙熊爲霖楊方立邑進士余騰蛟爲莫逆交霖曰盛季子直章江人傑應熙曰浮生塵塵須髮垂白回首蓋棺訖無長物水賓水賓將謂我何初樂受知甘冢宰汝來李侍郎紱晉接都門目爲學者樂亦不妄與人交所善如天門唐建中烏程沈瀾維揚江昱江恂廣信蔣垣蔣士銓盱江趙由儀饒學曙潘從龍陶其慤同郡夏之翰劉謙皆一時才人也年四十三卒得其傳者門人汪軻楊垕從子盛樵樵字雲子才邁絕工詩文未冠而天樂甚傷之余騰蛟有傳見藝文

張應遴字可佩後街人雍正壬子乙榜初爲諸生時廣文朱炯器重之炯高安朱文端第也以憂去遴詣弔文端以弟故慰畱數日與語皆中節文端稱炯爲知人時南郡七屬皆得減浮獨武寧格於議不得上聞遴乘閒自相國文端命呈於巡撫久之不獲請竟怏怏而歸武寧學宮舊在縣治東遴建議與陳亮彥諸人遷於縣西規制一新士風大振遴獲科族人議售壠木以贈遴辭曰幸承祖蔭登賢書而反伐其木是忘祖也何以金爲議遂寢因集同支建祠致薦族人減糶服焉遴性耿直操守嚴終年不至官署遇公事慷慨自任不少瞻徇故人忘其介而樂觀其成焉期滿截取知縣以老辭年七十與賓筵邑令鄒應元厚禮之邑人盛大謨爲之傳

汪軻字輦雲安樂鄉人工詩初困江省無所知名獨與新建熊爲霖友善迨太守吳公見其詩特加稱賞達於凌

觀察彭方伯及學使者金檜門諸公咸奇愛之聲大噪
與南昌楊屋南豐趙由儀鉛山蔣士銓齊名有江西四
子之目一時才流無不傾倒再遊金臺無所遇以貢授
吉水司訓卒於官著有魚亭詩鈔藻香館詞子敦淑充
四庫館供事議叙選福建延平府照磨

人物 處士

宋

鄭郊字子通襟期清曠志行純潔慕周茂叔爲人鑿池種
荷花以爲樂每天氣清爽縱鴛鴦池中往來披拂五
色相亂郊飲酒賦詩其閒翛然有塵外之想黃山谷詩
云鴛鴦終日愛水鏡菡萏晚風凋舞衣皆貫境也郊與
山谷及清上人爲忘形交山谷訪清上人過鄭郊草堂
因相傳爲草堂山人

按鄭郊數見於山谷集有太和書贈郊詩云草堂鄭
郊處士隱處也小堂芙蓉盛開使雞伏鴛鴦爲雛與
人馴狎不驚又有荊州書跋云題詩子通之壁舊志
訛爲鄭文而鄭氏譜亦不明其本末今從黃集訂正
冷轟龍字季霖寶祐乙卯以尙書舉於鄉不樂仕進講授
林下日窮經史以自適所作易說與伊川傳互相發明
疎密淺深各從其議大有功於後學云易序見藝文

明

邢欽詒南冲人號尙山少爲諸生負經術結榭南昌與萬
尙烈友善以節義文章相許往復議論甚暢已而恬修
林下著述自娛尤深易學學者稱爲尙山先生

按萬尚烈新建人萬歷辛卯舉於鄉歷官平越知府致仕歸講學澹臺祠又主新安還古書院少師事章斗津先生篤於性命之學

人物

忠義

唐

段逸唐僖宗時人太尉秀實之裔爲御史中丞死於忠義且有德於民鄉人立廟祀之

宋

冷洙字晦源昇仁鄉人宣和甲辰進士授潭州司戶遷武安軍節度掌書記賈修薦之扼於中貴尋罷歸紹興間叛將李成寇武寧防禦使岳飛知洙才檄洙與湯執中禦之洙慷慨誓眾與成戰於卬斗港敗之成怒合兵圍洙殷土橋洙冒矢突圍大呼殺賊力屈而死兄澄弟冲益發憤攻賊率眾前驅奮擊斬獲無算事平予卹典邑進士冷應登有傳見藝文

按賈修薦洙疏云洙學問該博吏材強敏可勝重任又見知於岳少保委以討賊兄弟悉出家財募眾守禦忠肝義胆照耀一時馮志並遺不載可歎也

冷冲與兄澄洙會湯執中端禮等禦李成之亂率兵力戰岳忠武壯之有紀功錄見冷起予文

李彥先武寧人建炎初與陳士尹同應詔勤王鏖戰十五年忠義激烈奮不顧身屢敗兀朮於江州江州倚爲長城後兀朮悉眾來攻彥先與士尹挺身決戰兀朮奇其勇欲降之彥先曰我奉詔勤王不能斬將搴旗以雪耻

而向汝輩屈膝乎兀术大怒戰益力不勝與士尹皆死焉事聞贈保義郎

按陳士尹德安人字彥衡與彥先同在軍中十五年屢奏功同沒於陣淮西統制兵馬使勅立碑祀之見江西人物志

葉闇端平甲午貢禮部授崇陽令有聲其子燾領鄉薦景定庚申春北兵至闇被執燾挺身出救闇曰吾宋臣也死而已燾曰燾死不離吾親父子大罵賊俱遇害邑人葉惟華有傳見藝文

冷應元字英叔昇仁鄉人父夢虎由端平進士除容州司戶卒無貲歸籍應元涕泣經營歲餘始扶櫬還人稱爲孝淳祐庚戌第進士授龍南縣尉權知興國信豐二縣轉漢陽軍司理以母憂歸景定二年除海寧軍節度推官與宦官李忠輔抗當事者擠之上不聽尋遷禮部員外郎時大臣陳昉李伯玉馬廷鸞又薦改奉議郎通判臨安咸淳二年出知婺州又逆外叔潛悅陷以事罷歸十年起知韶州德祐元年擢廣東提刑元兵至步將梁雄飛與廣帥徐直諒陰約迎降城陷應元徒步巷戰力屈被執元將釋其縛欲授以官應元大罵不食而死崇祀忠義祠有傳見藝文

元

冷啓濱字志文有文行善騎射至元戊寅陳胡寇武寧從兄應箭討之濱爲前驅賊設山寨累石爲下壓計濱與官軍負木進攻賊發墮石遂以所負木倚山抵石破之

賊又射濱中滕濱拔矢驅馳賊乃敗走

按應箭字志仁機警有謀時辟爲縣尉與啓濱率眾同討賊云

李爵字受卿港陞人生平尚義勇有氣概時徐壽輝起兵蹂躪湖廣爵慨然曰何可使生民受此荼毒迺率壯士萬餘往戰晝夜交鋒力屈死於陣轉者方國寶函其首以歸

胡紹遠長砂人至正壬辰外寇侵燬縣治居民四逸紹遠兄弟五人倡義聚眾保障鄉閭賴之以安者五年江西右平章道童左平章火你赤遣官賞禮幣特加慰勞己亥秋與僞漢陳友諒兵戰於建昌之麻潭不勝兄弟皆死之御史大夫帖里帖木兒奏聞謚忠義贈中書右丞

相鄉里立像祀焉明洪武三年加封忠武公今祀忠義

祠

按至正開有聶潮玉崔秀南盧甫李奇王才夫姚以忠及彭九垓兄弟皆與紹遠共舉義旗力拒友諒及麻潭敗陷沒者甚眾而聶潮玉入明再徵不起其節行尤卓卓云

明

陳一泰字安宇北門人萬歷閒以貢任大庾訓導遷瑞州教授秩滿授廣東博羅知縣致仕後閉戶著述邑侯寇可教尊禮之鄉飲者十二年八十有八闖賊寇縣親屬昇一泰避亂山中一泰曰吾爲師儒苟趨避免死雖生亦覩顏人世耳僵臥不起賊至一泰罵之遂遇害

盛宗貢字元珍坊市人性仁厚冲和恬然不與人絜短長時稱長者明末營將鄧雲龍乘流寇之亂恣意殺戮貢

宅在城內爲所踞時避亂山中聞之幅巾杖履謁雲龍
軍門雲龍嚴裝以待既見降階屈膝稱貢先生雲龍飲
酒醉輒殺人以爲樂縣尹以下稍忤意輒鞭之貢感以
至誠或至滄泣相喻時賴以保全者不可勝數有某生
者嘗以事陷貢子於難既爲雲龍卒縛至將殺貢見之
曰此吾故人子也遂釋之貢宅後故有黃氏塚一日雲
龍謂貢曰吾相先生宅不宜有此吾爲先生去之貢不
可雲龍怒曰此自吾意何與先生事貢免冠頓首願以
死請乃得存嘗掃祖墓見塚土纍纍畧無封識營石碣
詢其姓名悉爲封題而去子德輝以文行徵辟德壽以
孝稱於庠序云

盛彌俊字逸園羅暇人少補諸生治春秋有聲著有四書
講義墨稿尙存崇禎閒時事日非乃發憤上書言事學
使者不可遂寢及闖寇之亂而俊年已老聞京師失守
痛哭不食者累日旣語其子曰國家養士三百年小人
養寇自固而草澤中竟無負血性奮忠義率一族以勤
王者吾老矣言訖泣下乙酉流寇掠武寧邏騎四出賊
至羅暇眾倉皇逃避俊冠服危坐讀書賊入室俊神色
不變厲聲曰逆賊而至此耶吾恨不盡殲爾曹以報先
帝今已至此耶遂以杖擊賊賊怒脅之行俊奮袖大罵
遂遇害俊妻林氏聞變泣曰夫死吾何以生爲與其子
婦萬氏王氏俱赴水死女服姑投崖死次子翥奮戈擊
賊不勝亦死祀忠烈祠邑令鄒應元有記

盛彌科字文選坊市人爲人慷慨遇事無難色少攻舉業

不得志於有司又以國事危蹙賊兵四起遂棄去學孫
吳兵法嘗聚石數斛於圃中布陣圖慨然思見用於世
崇禎十四年縣城傾壞鄰烽告警科謀於邑人率眾繕
葺城賴以完明年賊益橫南北蹂躪餉道中絕詔募壯
士運糧北京聞者心悸科應詔領江南諸道糧冒險兼
程以進竟達京師上嘉其能授南營守備久不得補棄
之歸值營將鄧雲龍乘亂殺人慘毒備至科憤甚與友
人張安世杜棟羅懋備輩八人謀攻雲龍事洩爲雲龍
所執竟困鬱死邑人余騰蛟有傳見藝文

胡士奇北鄉人崇禎末任郊縣典史時流寇李曹聯營橫
行千里絕援壬午九月賊攻城急士奇謂主簿陳惟孝
曰盡節此時也城陷慷慨罵賊而死見河南通志殉節

名宦

張穀字凌雲山口月嶺人明末郡庠生少明春秋喜談天
下事尤精韜畧慷慨自負比闖賊犯闕穀謂人曰明天
子深仁厚澤吾祖若宗生息百餘年一旦至此予當出
死力爲天下倡語竟泣數行下遂棄諸生服佯爲黃冠
雲遊楚越久之爲金聲桓邏卒所獲聲桓知穀名欲降
之穀曰吾明秀才也無降理竟蹈刃死一子不知所之
余尊大余紹高皆安樂鄉人少雄毅以忠勇著乙酉闖寇
流毒聚眾合攻誓不同生挺戈以戰力不能支紹高遂

死焉

據府志增入邑人張望有追葬
鷺渚阡爲紹高作見藝文雜著

國朝

朱士先藍田人工詩文性篤友誼與盧圖龍善圖龍逮鞫

惟一幼子慨然辭家同赴 京師圖龍死哭泣不食展
轉求賻卒護其柩以歸周亮工有詩送之見藝文

李秀章昇仁鄉十八都清溪人少同兄質於陝携妻子寄
居安康值賊姚之富王廷詔率邪匪竄入平利安康欲
由佐林溝直趨興安城秀章偵知之集義旅奮勇爭殺
賊眾披靡督師秦見而奇之詢知爲江右客民也夜出
巡營霰落成冰猶持矛待詰之對曰賊勢猖獗公以封
疆大憲不憚勞瘁尙晝夜同兵民甘苦某何人敢貪逸
哉督師愈奇之未幾賊乘連日陰雨窺林溝薄堆窩石
山梁秀章持矛直出斃執旗賊賊圍之數重奮身擒馬
上賊共跌坡下受十餘鎗洞腹出腸猶不釋手遂遇害
督師上其事于

朝奉

恩命照五品銜議卹

賜葬入祀昭忠祠付史館纂列傳給與 恩騎尉世襲罔替
子二龍芳龍英後督師移江右爲立傳見藝文

汪騰雲字樹桃坊市人狀奇偉膂力過人由行伍授南昌
鎮標前營奉新縣汛把總嘉慶元年湖北教匪滋事騰
雲名在徵調中慷慨就道與匪相持於當陽縣地多山
谿洞壑督師命與千總余銓把總黃超雲馬文亮各倚
角守賊忽逸出騰雲奮勇爭先斬馘無算上官嘉與賊
憤甚使羸弱數十人誘我師入深谷覆起騰雲於馬擊
殺甚眾卒與余銓皆遇害事聞奉

旨給葬祭入祀昭忠祠無子弟騰飛次子宇銛爲嗣襲雲騎尉

世職有傳見藝文

潘蛟北鄉查坑人力強健由行伍拔錄額外外委嘉慶三年湖北教匪滋事蛟應徵調遂行遇賊於達州插旗山身先同袍奮勇搏擊賊鳥獸散蛟追殺竿首於馬上而旋次日復遇賊勢張甚殊死戰而坐馬失足遂被害事聞奉

旨入祀昭忠祠予廕襲以支屬俱盡遂寢

劉陞昇仁鄉十三都人原任寧都營把總嘉慶八年勦捕陝匪陣亡奉

旨入祀昭忠祠給襲雲騎尉世職邑人劉汝楫有傳見藝文

附錄嘉慶元年至九年湖北陣亡弁兵十三名在鍾祥縣亡者冷逢陽梅光瀾巴東黃紀南漳費廷陞張廷蘭襄陽葉青汪步廷張玉盛魁王吉長陽胡贊雲王勝隨州官潭張華軍營病故潘連盛啓龍李成彪周占林張啓元李遇貴六人

人物孝友

唐

沈季銓字子平洪州豫章人少孤事母孝未嘗與人爭皆以爲怯季銓曰吾怯乎爲人子者可遺愛於親乎貞觀中隨母渡江暴風母溺水死季銓號呼投江中少頃持母臂浮出水上都督謝叔方具禮祭而葬之

按豫章縣自晉太康歷五代至唐長安四年始改爲武寧縣蓋唐初貞觀尙屬豫章也其間四百餘年典籍無稽人物寥寥或混入他縣者尤有待於蒐羅

宋

葉泳字少游上南鄉人好學能文舉於鄉事母楊氏甚孝母疾危泳割股以進疾已邑侯柯甲聞於上將易其里為孝里泳力辭柯曰何廉於取名也宜易其里為廉村廉村之名自此始

冷耀字懷遠鄉貢事母至孝嘗築室南坡日融洩其中母卒終身不離坡上真事死如生事亡如存者也

葉開字茂老幼邁異從李厚齋習科舉業誦語孟學庸慨然曰讀書乃專為科舉耶遂不入場屋日侍親左右承歡無少怠父母喪廬墓六年有白鹿來馴之異理宗時寇數迫境開屢設策禦之賴以安全名公巨卿往往聘薦交至開皆力辭唯讀書以自娛尤喜種竹陳閣仙贈以詩曰自是淵明一等人年八十九葬於南鄉西溪之

原文周應合志其墓見藝文

冷履信字誠夫與弟履道應熒相友愛飲食必同席出入必聯轡每團坐論文夜半乃寢一家相為師友極天倫盛事也

王仲友安樂鄉人淳祐七年父病劇割股作肉糜以進病尋愈有司表為篤孝之門

王汝正安樂鄉人咸淳中母張氏病篤割股為糜以進遂瘳人稱為孝

按馮志以割股入孝行者九人除省志二人一統志

一人外如下南鄉萬建先朱自順坊市葉正春汪以欽陳國柱南市盛彌建六人者皆以割股救親留名

邑乘有明一代孝子接踵或並世而生所爲又皆相同非聞風而起者耶何其多也因附著焉

明

陳仲賢安樂鄉人少孤事母徐氏甚孝母病刲股和藥服之愈後遊京師聞母病卽歸母危甚潛入深谷剖脅取肝煮粥以進病復愈永樂初事聞授鴻臚寺丞旌表其門

胡英良江陰鄉長沙人庠生父母繼喪祖母盧氏廢病良舉孝廉以乞終養辭寢食起居左右抱負奉侍不衰祖母之年至九十皆其力也更祀忠義祠

按舊志載澧溪聶世奇母患目盲齋戒顛天時以舌抵母眼復明坊市陳國豸親設哀毀骨立寢苦盧墓聞雷輒有泣聲縵川李復泰事母甚篤此皆一代之孝行也

盧孔秀字

下南鄉人狀貌魁偉勇力絕倫日食斗米

以善射著名正德間運糧至省漕司見而奇之樹的命射連發皆中賜以肩豚饗酒一舉立盡聞之中丞中丞曰此將材也非人臣所得有當令立功朝廷始盡其用於是舉於朝乘傳詣京陛見時上亦深喜得人授直殿侍衛驃騎將軍將大用之人皆稱慶卒以母老辭歸

羅通坊市人宏治間歲薦家徒壁立事母曲意承歡色養備至官善化縣丞未三年棄官歸囊空若洗或哂其貧通曰吾竊祿於朝一無所報効反顧生平負恩已甚尙敢爲子孫計哉祀鄉賢祠

余弼字相之號柳溪沙灣人天資瑰異讀書十行俱下弱冠有文名與李鼎汪應婁輩結匡山詩榭時習尚晚唐弼獨宗魏晉務爲清靈淡遠風格迥上人莫得而至也後從羅洪先遊深會良知之學淵然有得爲羅洪先鄒守益高弟築賓陽莊講傳習錄四方從者頗眾初弼尚象山郡主援朝列大夫遭父喪故事儀賓從王府例不令終制弼聞赴不待告竟去匍匐視歛哀毀踰則旣葬廬墓三年士論高之弼少負經世志學行文章隱然動朝野見者交相推重然竟以閒職終

葉一燭父病篤醫曰穀道壅滯非藥力所能通得人吸之可痊諸子愕然一燭曰力有可竭而不能奚用子爲遂如其言病乃已父以遐齡終

余素澗字玉村號崑岡上都人少孤事祖母與母以孝聞好讀書務爲有用然性恬退不樂仕進治家整肅子弟淳謹上都余氏累世稱長者有萬石君之風焉

葉雲會邑諸生父蔓以姻累誣之以罪胥役索蔓行甚遠蔓有十三子皆滯泣無計雲會抱父泣曰子在豈可使父受枉死耶遂代父罪受酷刑至七日幾死不屈臬司感而嘆曰真孝子也憐而惜之父枉亦雪而雲會卒以傷疾竟死

國朝

盧圖龍字毓仁號雲葦球場人父沒始生母周氏教養之八歲時見左傳秦漢諸大家文輒有奇會家貧不能得書假之鄉里故家竄目咸誦人咸異之中順治丙戌舉

人官汀州司理丁母憂歸尋以同讞周亮工事被逮京師病氣結死甲乙之際流寇入境圖龍負其母避亂山中子斌憲初脫襁褓勢不能兩全將棄子灌莽申周曰孫孱弱謹提携母我顧圖龍卒棄之亂定斌憲亦無恙歲丙戌太荒民求食不可得將不靖圖龍言於有司發倉粟賑濟所全活甚眾金聲桓據南昌時守將鄧雲龍擁眾武寧爲亂圖龍責以大義鄧怒幾不免及大兵至圍雲龍城中不下將屠城圖龍出見主帥曰大將軍所以至此者爲百姓故也今以雲龍故屠城城中民獨非朝廷赤子乎願將軍熟計之主帥曰諾先生幸有以教我圖龍曰請爲將軍招致之遂入見雲龍道之就撫武寧以平其司理汀州也汀處高山中多盜吏不能治圖龍至歎曰此輩非能盜也苟歸順當予以自新路若怙惡不悛然後以大兵殲之於是盜首孫文奎俯首廷下乞禽餘黨自贖圖龍爲請得無坐諸盜聞之皆散去初周亮工官于閩以事落職逮燕邸圖龍至閩同讞其獄主者周納之圖龍力爭不署名主者竟代署後亮工以質訊至圖龍奮筆具狀諸同讞者亦直圖龍事始平反已而以前後異議逮亮工廷鞠併逮圖龍圖龍性卞不能忍對簿時憤激一痛而絕未幾亮工事雪諸同讞者皆遷秩而圖龍獨含鬱以死可慨也亮工志其墓見藝文

陳思珊字翠池坊市人順治甲午舉於鄉授南城縣教諭尋丁母艱復爲廬陵教諭遷瑞州府教授致仕歸卒年

八十七珊幼有至性事寡母左右無違順治乙酉流寇
攻縣珊負母走避遇寇急不能脫匿母蓬蒿中珊伏翼
其上賊過見之以刃擊珊珊佯爲死血淋漓濺衣領閒
少頃後騎復至又擊之珊首被刃者三賊以珊爲真死
乃去官南城時前學官某以宿怨被繫逆黨珊至知其
冤力爲解脫時南城諸生以從逆被誣者數十人按之
皆無驗珊悉爲出之初康熙十五年同邑人蕭引鳳汪
起龍盛允齡張禹門張居午招撫平坑流寇鮑令上其
事總督董嘉獎之見定變畧及沒言笑自如不及後事
作詩以別子孫屬纊顏色如生子春萼丙午歲貢爲人
醇謹有父風

冷亨龍字子立昇仁鄉人兄弟分財田業器物各取其良
亨龍甘受窳陋不以爲嫌咸淳戊辰舉進士

盛時字集成坊市人丙申水旱荒時家故貧所儲米數十
釜悉傾以賑之從兄晴寔甚無以自存時月有常奉晴
倚以爲生晴死爲具棺衾殮葬云

盛鍾靈字文潔南市人性木訥好學能文而務爲堅確之
行康熙丙申年河水溢侵屋祖樞在堂將浮矣靈大慟
死守不去幸水退乃免柩得無恙垂老以次貢官宜黃
司訓率性守分不與人爲俯仰諸生勸之且資之靈謝
曰吾豈能抗節者但不敢以非禮事人竟歸歸益窮困
晏如也

舒鏜字聲遠長樂大注人侍母病憂形於色髮遂華一夕
夢人趣遷新宅覺卽奉母移居俄而故宅燬人以爲孝

感里中水圳沿山爲路崩壞不時農旅交困鑿輸多金倡修村田永享石圳之利其子太學生素笏請之當道爲記勒石

盛明富鳳溪人幼孤母再醮無出且窶甚富備牧資給母老預製棺衾送繼父處被鬻無怨言復製如故及母死繼父出殘衾殯富新製償之歸葬之日哭甚哀行路心惻廣文蔡錕白於邑令黃泌旌曰用力忘勞後諸當事及同族助之婚且有詩歌紀其事舉一子甫二歲富卒葉桂大字青五昇仁鄉太學生性最孝母病噎不食亦不食父沒廬墓經年族有因債鬻妻者代償以全同里譚某生一子而母歿貧難爲乳令婢乳之旣長還其父戚友無依者每給以產死則殯葬之里中通衢亭路壞輒修治邑公事無不與焉助修義學見學校志

盧宣耀字聖元中潢人少貧客寧州嘗一日夜走二百里視母疾人以爲難天馬藍田二水當孔道木橋圯輒病涉耀爲伐石堅築躬親督役二橋次第告成凡費金四百兩又捐社穀三十石宋令旌之曰誼篤維桑子兆明蘇皆諸生明捐 府志費五百兩詳藝文

盧迪字礪崖安樂鄉吏員善讀書篤友義弟迷病篤宅中不時火起同居皆避去迪以弟病不忍去日夜謹護之火卒寧戚屬王某累世單傳負重不能償議鬻妻迪聞之蹙然曰此絕續之關也何可爾卽爲償所負妻得不出後生子續嗣人皆義之

田懿年字維範月田人慷慨明大義嘗遺命諸子曰吾邑

文廟多傾圯惜予力薄不能首倡後有舉此事者汝曹當共襄之乾隆己亥公議重修其子與孫捐金葺忠義祠以成先志至割股醫母病尤爲鄉里所稱述云

張義中江陰鄉梅林人父維舟河北適大水浮薪解纜取薪遂溺於河義中自南岸望見大哭急赴水破巨浪達河北援父出水父子竟無恙人以爲至孝所感見邑秀才蕭露灤詩

張居柳字希厚坊市人讀書能文家貧弟幼筆耕以供菽水得親歡父病醫者謂不治柳嘗糞大懼遂剝股肉以進父病竟愈後父沒柳過哀成疾卒子二長炳蔚次立元節母盛氏苦而彌貞矢以勤成以儉克遂柳志元太學生欲爲母請旌盛曰可然先作善事謂汝父賢建坊

其有待也遂伐石修南市通衢百十丈有奇時論高之孫紹泰國學生次紹璣號渾齋性淳樸父嘗病噎不食亦不食母病帶不解者踰月兩丁大故哀毀骨欲露然人以爲真孝子後也遇弟惟自損挹以友愛終故署其堂曰怡順爲文力追先正見器名學使趙鹿泉先生鄉試五薦不售乃由廩貢授訓導歷署縣教諭府教授事所至先以立品訓士士論翕然晚年家居喜覺後進諸來就正者竟日指畫口講不倦赴義若渴雖重資每獨任焉往周陳二中丞前後詢各屬人品縣父獨兩陳渾齋事蹟以對邑都督大鵬微時渾齋承父志力培植之爲請

旨賜封武功將軍著有散體文不波居制藝有傳見藝文三

曜璣湖北候補縣尉曾孫向辰邑庠生向斗邑增生議敘通判向仁由州同職議敘同知

善士

宋

李宗道縵田人淳祐壬子鄉舉任玉山縣尉致仕歸縣西七里崖石危削下臨修江鄉民紆道達城宗道鑿山爲路往來稱便鄉人立祠祀焉

陳光崇字功顯號柳隱山口人修復柳山書堂聘名師合宗戚閭里子弟講學風氣大盛

陳仕元字時章號松谷當塗縣丞廷芝之子柳隱之孫以柳山書院燬於開慶兵燹復改建祠宇春秋祭祀制度大備丞相章鑑有記見藝文

按松谷陳氏譜載屬柳隱之孫章記云柳隱其父似難考信松谷德祐間人柳隱修書院應在理宗之時

而陳譜乃云紹興時修者大誤

竺壽翁名興龍仁義鄉二十都人嘗於太平宮施山數百畝及田坵水田百畝鑄大鐘重千斤其女梅英修東門外石橋見列女

按前志載壽翁西郊人誤今從太平山鐘文訂正

江成政江淑恭瓜源人咸淳間開山鑿磴使人出入見石刻

江十六郎瓜源人咸淳間關修絕嶺避水鳥道連雲峭壁有石刻尙存

冷釀龍字子深咸淳間免舉嘗仕廣東同僚周公輔通城人也歸卒於道釀龍殯送其家凡族有不能婚喪者皆助之

明

趙德明長樂鄉人文登縣丞修整長墅源路有石刻雷壁徐仲器順義鄉人正統六年納穀一千五百石賑荒同年豐鄉李志仁納穀一千一百石長樂鄉葉伯志納穀七百石備賑

葉學源上南鄉人正統七年納穀七百石賑饑又同鄉周榮通納穀六百石江陰鄉蕭添瑞納穀七百石長樂鄉盧興崇納穀七百石備賑

李志敬年豐鄉人景泰四年納穀一千六百五十石賑荒徐礪本清江浦楊姓天順二年納穀一千二百石賑饑又倡義遷學助金百兩日往督工當時賢之

王泰天順間納穀一千石賑荒

萬宗澮下南鄉人天順五年納穀六百石備賑又七年年
豐鄉李本鑑納穀五百石賑荒

盧均楊字秀軒長樂鄉人同余用江鑿長墅源山麓爲渠
灌田數千畝至今人受其賜

葉希道廉村人成化四年納穀二百五十石又同村葉茂
納米二百五十石備賑

張文獻字國徵後街人成化間修學以旁基逼隘文獻慨
然割地十餘畝益之士大夫高其義

盛璟盛璽羅墩人七里山始於宋李宗道鑿路山腰險峻
難行宏治十三年璟璽兄弟捐貲改鑿其下車馬甚便
學博洪世傳有記見藝文

張良員良贊北鄉人兄弟友愛累世同居中丞以下皆旌
之

汪孟昊坊市東井人鑿北鄉洪崖泉水灌田數百畝至今
歲不憂旱人受其利

盛環字玉振羅墩人正德間知縣陸浚欲遷學以費不貲
事且已環聞之躬自經紀其事卒以大就又嘗修祖廟
置義田以贍族中寒士晚號鵲巢主人

鄭尙華坊市人嘉靖元年建看鶴橋構亭其上又修孟家
灣路甃石數里邑人杜玉樹有記見藝文

盛蘭坊市人邑學生文士樂與交遊稱其巷曰交蘭巷嘉
靖間旱荒出穀八百石賑之全活甚衆

潘珂字世鳴邑廩生伊山人家故饒嘗建伊叟祠以爲鄉
人禱雨之所嘉靖乙酉督率家人工匠鑿險通道興國

費工十萬有奇一時稱便孫大藩續修之

汪蓬山東井人嘉靖間修城山董其事日夜經營費不足者捐金助之萬歷九年通判張翼督丈田畝諸事一倚於山戊子荒旱山助穀一千二百石賑之年八十三與賓飲者七

鄒喜陽上南鄉人南鄉至縣城路甚艱險鑿新開嶺以通之又治清隱橋免涉澗水鄉人頌其德

盛廷贊號南崧羅墩人寶慶府教授嘉靖間倡修儒學舉同族盛溫經董其事溫經與潘何皆大有力焉邑令黃一鵬有記見藝文

周成貢坊市人萬歷二年獻地助金修青雲街疇有張本

湛黃仕冠番大穆皆納地焉

葉坤韜上南鄉人萬歷三年出粟賑濟四年獻學田五十畝助修西門外書院又建潘埠橋捐修羅溪公館人皆義之

陳瑄坊市人萬歷九年捐金助修儒學

盛應合南市人萬歷戊子奇荒竭資施賑活人無數

張溥下南鄉人萬歷間建城南浮橋橫亘九十餘丈兩岸立石堤治舟七十餘艘列木爲梁旁繫鐵纜奠以錘纜計費千金學諭許宏基有記見藝文

張添權安樂鄉人萬歷十七年納穀三百石備賑

張克儀字鳳衢後街人性謙和淳謹天啟五年饑旱出穀五百石備濟邑令徐士華申請旌表長子金學字蘊玉次子安世字尊美畱心古學推重一時康熙間邑令馮

其世徵修縣志兄弟咸與焉時金學年最高與同事汪克淑輩核論精詳令深器之嘗稱曰逸叟安世有聲庠序負袒畧敢於作爲事蹟詳入義士傳見藝文

萬希舉下南鄉人天啟乙丑荒旱出粟三百石濟之

田萬鐘下南鄉人性肫篤不苟然諾與清江丁文濱友善文濱夫婦客死有遺資一子明楫甫周衆憐之以托於鐘值世亂備歷艱險撫以成立及楫受室鐘以濱所遺物與之皆受託時緘記未嘗耗其半縷云

鄧孔豁字文貫昇仁鄉人邑學生凶年發粟賑饑全活至數百人

葉喬昇廉村人邑諸生屢困不第隱林下自娛常周人之急不責償族中因徭役背廬并者喬昇力爲調護出已貲以代其役人咸德之

李初放纓川人父喪撫幼弟弟喪又撫幼姪均所創產授之人皆義其行

陳以經字元常坊市人建書屋東南城外廣集生徒大設庖爨爲往來講文之會晝夜不輟請開通濟門以便學者詳見雜記

余尊鄉字元善安樂人明末流寇充斥所過殘滅尊鄉同姪新國集衆練習金草以備攻守鄉人賴之

盛德輝號雪墅坊市人爲諸生負才氣傾壓一時與余學優同以幹國全才辟薦值鄧雲龍之亂紳士側目輝能大言雲龍卒不能害邑人多倚賴焉

余素紹號松吾長樂楊田人以逆闖蹂躪村谷率族黨疊

木壘石於險隘處擊賊死者甚衆日久寡援遂遇害其孫學翰曰原參者負才志有胆畧結納豪傑時皆倚爲重任

羅斌字三有上南鄉廉村人明諸生崇禎末應募上策聞懷宗崩遂歸適荒旱斌率鄉人白令令方急催科反因縛之鄉人大噪散去令以變聞將移兵討之斌鳴於撫軍得白鄉人賴以保全時鄧雲龍禍武寧劫斌至麾下曲池張族忤雲龍雲龍發兵屠之斌密令避去得免雲龍又禽菖蒲山劉氏索餉嚴急斌請釋歸取金旣釋斌亦乘間遁歸集鄉人扼隘固守雲龍憚不敢擾南鄉得以無恙

按馮志所載胡光祖之力古李初芬之好學周允昌之方正盛運開著述甚富廖匡時灑落不羈皆一時之選因附著之又李復泰汪以通陳文輝張志學吳宗儒章興橋吳道行張靄臣並列儒行查無實行可紀故僅存其名 梁志

國朝

盛彌焜字抑之邑諸生有氣節元末陳友諒徵賦浮甚明季踵之國初南昌郡上其事獨遺武寧焜憤悒不食上書力爭往復辨論氣益激揚卒以異議相持不能定事遂寢詳見雜記

盧由惠長樂中潢人順治丙戌大荒發藏金三千餘兩分給鄉里全活者不可勝計子大捷字墨林康熙甲子武舉兄被誣繫獄大捷痛泣破已產千餘金力營解脫士

林重之

余學化長樂上都人字性育丙戌荒饑殍盈野化糞粥沿途救濟數十日存活甚衆

王明頌字三錫郡庠生大舍人羊腸灘石險銳頻壞舟溺人頌捐金鑿之夜夢神人戒止不聽神復降於庭獸面獐猙圍屋有戈鐵聲家人震駭頌益督工開鑿竟平其險又鑿洋坑石棧數里時稱爲義俠

盧先覺字右卿長樂鄉峽水人以歲貢授信豐司訓邑中大事多率子弟倡舉物望甚隆及司鐸一以端士習培文風爲務學使者有厚重淵雅識學兼優之薦辭致仕歸子之麟甲午舉人之鳳字萬元詳後

余文煥字韞章長樂沙灣人順治丁亥饑傾廩賑濟人多蒙其惠族人議建祖祠集金貯煥處值流賊至瘞金逃匿山中賊搜山縱火幾及煥嘆曰死自分定惜族人不識所瘞金奈何俄而火滅比歸室已燼矣卒出瘞金建祠無所隱長子普明字式九歲貢生能自愛時有醇儒之目教授數十年城鄉文人多出門下次卓明字輝生鄉賓豪俠好義事母以孝稱邑令王簡之旌之曰品先百行普裔光先紹烈光廷皆邑增生冤心黻興槃煌皆邑庠生光策廩生虹鳴臯皆舉人卓裔見龍拔貢詳後鄭韜字六文桑溪人少爲諸生有俠氣白頭兵敗守備馬文燦勦餘黨禍及劉氏一族韜遽趨營見文燦曰若皆無辜迫於所脅何爲波及以失民望乎文燦釋之舉族得全

葉夢鷹字元亮上南鄉下墩人邑諸生量能容物性好施
予事繼母劉至老無閒言族人元舟與靜寰相惡寰妻
死誣舟鷹曰不可或謂寰曰元舟貧元亮富寰竟轉陷
鷹笑曰飽汝欲事寢又容立賢老而狡誣鷹臬轅曰身
長丈二及鷹至長不滿五尺事白而容乃重得罪鷹爲
解脫攜之歸且飲食宿寓悉鷹支持終其身善遇之初
順治戊戌己亥歲饑鷹罄貲賑貸後飛穀入宅人咸謂
積善之報云

盛彌延字永齡南市人負幹才老成持重官民賴之康熙
甲寅白頭寇南鄉賴延保全十五年同陳思珊招撫瓶
澗張姓爲白頭迫領偽劄將移兵討之彌延請守將令
縛賊自贖卒賴以全初張居午倡義保固鄉里後以隙
與順義銀爐幾相殘虐事聞鮑馬二公手書請延往諭
卒爲排解報命云

汪克淑字爾止坊市人歲貢生能文章負一時重望康熙
四年邑令馮其世垂意斯文慕淑名乃請修治邑乘時
文獻散軼淑與盛士吉張金學輩哀集舊聞不事文飾
纂輯成書至今猶恃爲典實焉

張居午上南鄉人少負幹才有俠氣康熙十三年白頭兵
入寇午罄家私備糗糧具器械倡義防禦西南半壁賴
之以安一時稱爲義士鮑馬二公獎勞硃墨至今猶新
十五年招撫有功見陳思珊傳

張禹門上南鄉平原人狀貌魁梧力能扛鼎康熙十三年
爲練長扼守朱山隘口斬賊首十七級獲偽票二十九

張戰功第一與同族居午有二張之目十五年招撫有功見陳思珊傳同事周維達地保葉明梁章及葛王周艾四姓皆能殺賊用附著焉

熊翼生長樂杉村人少貧獨力經營家既饒盡出所有剖之凡同祖父昆弟皆均授焉初賦役未平凡大戶有氣力者小戶附以輸將浮於正稅十倍爲患甚苦翼生鳴於上令諸戶不得統制聽其分割自爲輸納民累大甦至今便之

劉瑞字良玉昇仁鄉人嘗開鑿青龍潭西石壁通水又治長石規渡楊坑水合灌魯溪洞口田其利甚溥世永賴之

舒美玉東湖人康旣好義時縣中治公祠兩立不支乃撤所居屋瓦以覆之又屢修西門外石橋邑令旌爲善人李君紹棠盤人羅恩二十五都人康熙十四年白頭寇由朱家山直趨南門圍城攻急鮑令招集鄉勇時紹率藥努銳手一百二十名恩率四百八十三名來會踴躍爭先賊衆奔潰事定詳報均邀褒獎鮑令旌曰山邑干城又同十三都練總柯斗南八都石連城同率精銳三百人及官兵追殺所至有功

余文崙字仲岳長樂鄉羅坪人少負技勇有膽畧與同事盧秋方俱爲練長康熙十五年三月二十一日白頭兵數百由靖安來蹂躪東西二源禍及孫李兩村崙給以犒軍誘至山谿伏發賊奔潰崙率衆追殺無數扼守隘口賊不敢犯鮑令旌之曰才可干城事見定變畧

盧以良盧季立盧興讓余新興盧公言俱長樂鄉五十一都人康熙十三年白頭兵由瓜源入寇駐彭源口良等迎戰生擒四賊俘縣斬之後二日讓等復殺賊無數賊走公言等截殺之斃十餘人又盧樓輅盧由容李召富俱五十都人追賊至關家坳殺賊九人獲烏鎗腰刀之屬賊大敗忿燒峽下房屋而遁由是不敢犯長樂矣劉可北昇仁鄉人吳三桂據滇叛使偽監軍莫友榮父子潛楚散劉乘白頭之亂黨附入寇敗竄下北山中可北偵知之引鮑馬二公率兵擒戮亂遂靖厥功稱最事詳定變畧

按定變畧尙載有張甘元李恩福張效宜潘昆梅錦佑又林日鳳墓碑亦載禦寇事今補入

余罷明長樂鄉人康熙丙申五月修江暴漲民居漂沒罷募舟沿河救援全活甚衆

盛璠羅墩人康熙五十一年洪水冲廢大陂潭堰璠捐金修築買潘姓地種樹附以巨石爲渠道堰得不廢闔境賴之球場盧又介鑿長灘崖修堰灌田至今利之

盧大中字盛文長樂鄉大田人邑庠生陰行其善嘗鑿長墅洞石磴又修瓜源洞路費甚鉅親屬有饑寒者散以金然皆闇寂不求人知子三璜琬詳後次子琢邑庠生盧大舉字芳文大田人貢士初習孫吳補弟子員旋棄去應童子試學使者魚公奇其才拔置諸生愈自刻苦務爲有用之學初學宮荒蕪捐貲修治躬自經畫廟廡階陛門池巨細畢舉煥然一新又建尊經閣巍哉壯麗爲

一邑形勝凡費二千餘金方伯彭家屏有記見藝文雍正十一年州縣置義倉舉首捐社穀百石備荒岳大中丞給匾褒嘉又築黃陂堰灌田數百畝次子迪續成其志聯會置產邑令包必明有記子琳武舉任平山衛千部能詩文

余文坦字履安昇仁鄉人歲貢生性恬淡閉戶讀書終年不趨謁官長邑令吳之彥物色之以孝廉薦坦辭云蓼莪抱痛於早歲辭讓未著於萬鍾雖典渥可嘉而製錦未能安敢妄膺茲選以下負知己上累

聖朝况敝邑雖小文章道德出生之右者不知幾許乞回過獎以拔真才書詞懇切吳令愈敬服焉

喻良州號夢菴鳳口人余文果字九惠上都人田宏志號

月波月田人皆邑廩生好學能文行已清潔自少至老足跡不涉公庭邑大夫罕見其面士中稱高義者以三子爲最其授學立課皆有法度後之英達多出門下

盧煜字鼎文大田人真率有隱德不市嘗修龍石港橋水廢輒興凡十餘次計費數百金終身不衰煜父撫族人爲子煜待之如同胞相得無間將沒遺金買田爲合族義塾族人皆爲之勸益金以廣之其制遂宏子太學生璧邑庠生奎皆好義復捐金延師以成其志奎長子諸生晶幼慧能文早卒人皆惜之

盛大業字時占邑庠生有膽畧能荷重任儒學舊居縣東地勢卑隘乃與張應遴陳亮彥倡義西遷跋涉經營卒以就緒邑之興替多倚重焉晚耽鏡泉幽勝鑿池一泓

種蓮養魚與子弟讀書其間曰綠天書舫子周郡庠生
盧宏達字文澄中潢人邑諸生舉鄉飲賓好行其義雍正
乙巳鄉里大疫無藥與棺者多仰之嘗捐田三十畝贍
祖廟祭邑令田大璽有記

葉淑廣昇仁鄉人喜讀書潛心易理多所發明建書屋延
師課鄉里子弟買田十五畝歲入以爲來學膏火之資
貧者仰之稱爲義塾後興賓筵子桂大

盛世麟字志涼坊市人邑廩生負氣概慷慨任事雍正間
請減南昌郡屬浮糧獨遺武寧麟率衆上書力爭不可
得時主者同鄉劉景字人偉凡揮百金亦不以公事問
麟麟性樂施濟凡道路饑寒及死而無歸者每存恤之

王毓秀字玉行邑庠生坊市人性清靜喜讀書構別廬三
間種花木課子以自娛雖居塵市翛然有村野趣邑東
郊外七里許道旁有大樹垂樾如亭秀買爲行人憩息
地學諭揭達以其端方舉優行子尙文明經

羅任信字季彭廉村人郡庠生檢飭好義鄉人有鬻妻以
償債者信爲代償夫婦賴以全人咸羨之

羅九章字二季坊市歲貢生性謹飭獨好施予嘗倡修學
宮見盛際斯記又獻儒學田修南市石道及歲給養濟
院穀六石世以爲常子太學生彥字梁木尤慷慨義學
之役捐助多金督修歷寒暑不倦又重建學宮彥捐百
廿金補葺崇聖祠其歲造渡舟歷賑荒歉不勝縷舉云
潘池元坊市人爲縣掾不阿徇令意時劉令詳改漕運元
力爭不可得卒以張少宣成案駁飭令方信悟元益退

避無所苟年滿考授吏員性好善乾隆二年念養濟院
額少命其子崇桂給穀六石歲以爲常又常修東南二
處渡船接濟及捐社穀三十石邑令宋調元旌曰詎篤
維桑子貢生崇桂詳後

萬繼殷江陰鄉人地近三卷源峭石壁立仄徑腰懸殷梯
磴鑿石堵水遂成坦道子賢通鄉賓邦憲諸生三賢烘
皆有父風樂於爲善烘嘗捐金百餘兩修鹿頂橋二從
子少孤爲撫育完娶給以產業至卹貧施棺之類不可
勝紀

黃夢鶴字宏度上南鄉人幼穎異振起儕伍中出語輒驚
其師長康熙丁丑年得選貢不急仕進惟以教授自安
構留月書屋於舍側會鄉中子弟講經課藝貧者借資
助之一時學者多所造就

盛彌瀉字三鳳坊市鄉賓 贈修職郎少慧喜讀書爲家
督不獲卒業撫姪如子凡手置業悉均焉初姪士極失
偶無出誓不娶親友力勸不可瀉強室之卒綿先祀族
某被誣繫累瀉出重資排解始釋捐造南關渡舟垂五
十年捐獻書院膏火田畝鄒令高其誼舉鄉賓嘉慶丙
子孫曾復建櫺星門子玥號冰巢監生有文名工書畫
性友愛好施予邑常平倉短額捐穀五百石次楫負才
不遇次元績乾隆乙酉舉人任峽江教諭孫學蘇廩生
學賜學黃增生嘉謨嘉豫職員學杰學烹監生曾孫翹
選貢候選教諭翹舉人謝附貢生試用訓導翎監生元
孫紹曾監生精寫生似其祖那俊職員紹賜紹昂庠生

盧宏道字六臣號東山邑諸生中潢人志操嚴潔動必以正雖七箸之微不肯苟且人亦不敢干以私父母忌日則設祭流涕終其身不懈且勇於爲義如復祭產賑水災保離婚葬暴骨鄉邑咸稱頌之道負智畧未得試其用嘗謂諸子曰凡學務爲有用無以居約故輒自菲薄年七十一卒時有老成凋謝之歎子廷麟邑諸生金鏡郡明經廷亮明經孫翹拔庚子副車

張育秀字仲簡黃陂人勤於治經垂老猶手不釋卷以歲貢授九江府訓導九江故衝繁地謹愿者頗不相宜秀亦以生平習靜厭居其官遂乞休歸食貧讀書如故舉鄉飲賓年八十乃卒

余見龍字永清爲文煥孫少補諸生試輒高等雍正乙卯
選拔貢成均大司成將薦用之以親老辭歸益肆力於性理諸書務有所表著淡於名利因自號曰淡溪其有德於人不自矜嘗極力脫族人之難而其人忘之亦終不以告人晚與從弟琛督課子姪工詩文多有聲庠序云子光發孫大鵬皆監生孫毓靈曾孫斗南皆邑庠生
余崇曾字繼賢安樂鄉人性剛正平物里人有爭者質之輒罷去喜交接凡文人遊石鏡山者莫不造訪時稱石鏡主人居常割其財產以興事佐役如捐義學田七畝祖祠田四畝捐金修陂田橋百二十兩建祖祠修夕漁橋紅厓路楊臯路皆以數十兩其好義如此乾隆十七

年大饑出穀數百石以備賑鄉邑至今談之子廷瑞監生鳴珂庚子舉人

孫士驥歲貢生士驥驥駒俱監生曾孫文棟毅彰邑庠生元孫堅郡庠生

盧璜字肇西大田人由太學生授州同職乾隆十四年奉制憲檄修邑乘璜慨然曰武於南郡望邑也舊志殘缺文獻無徵久矣及此不修將復何待因禮聘邑紳士廣蒐羅彬彬乎文勝其質矣始庚午終丙子費金一千二百有奇大中丞胡以璜獨成盛舉方議賞旋因他事追燬璜復有志釐正惜未得其人飲恨而卒弟琬字虛舟太學生好神仙建旌陽祠於朝元宮故址費五百緡

盛朝麟字右梁坊市人邑廩生能文善書邑侯吳公督學于公咸器重之初與邑人熊翰朱章明角力詩古文稱莫逆交乾隆己未遊寓江省朱適染痢症晝夜下血數斗床席臭穢不可當同寓者悉避去麟獨調護湯藥日夕意不少衰朱病卒賴以愈而麟亦復無恙也於西選貢學使者湯屬意於麟卒不果年未五十而卒片紙隻字人愛之如寶焉

張一飛字蘊彩號竹溪

封奉直大夫 贈奉政大夫少孤事祖母先意承志曲得歡心友愛諸弟境艱而情摯家徒壁立而一介必嚴生平於物無忤粥粥乎若無所能者而嶄然特立不隨俗俯仰閉門課讀延明經熊鎮瀾教其子十七年不易師胸有定識類如此子華甫乾隆辛卯進士任廬州知府煥壁郡庠孫富業嘉慶己未進士富經丁丑進士

盧宣煌字萬彩長樂鄉鄉飲賓乾隆初年捐穀三十石貯社倉以濟都里中潢街邑省通衢命其子太學生兆鰲伐石修砌併左右岐途費三百餘金兆鰲又伐石修縣

署前坪與橫街二百餘丈費亦相等人以爲有父風焉
盧應特字聲宏長樂鄉人邑增生事繼母孝母病湯藥必
親調以進凡數月不怠家頗饒鄰里以券質錢者不限
歲月便卽放贖其不能贖者取其券焚之人多感頌焉
子學泗貢生學江太學生

李如松年豐鄉賓乾隆十二年修仙桂坊石街六十丈
見城池志二十三年子孔圭修西渡港至茶山下石路
八十丈漁家壠路三十丈父子皆好義次子宗平詳後
翁茂海字君任安樂鄉下汛人恢廓有遠量家少有喜積
穀康熙丙申邑大水下汛栗榔石鼓當大河衝漂沒特
甚海散所積全活甚衆攝縣事徐廷弼以言行方正之
額旌其廬

翁志金字維品茂海子少刻苦讀書與張司訓仲簡角力
以進惜艱于遇然爲人美鬚髯襟懷浩落慷慨有達人
風逢義舉靡不踴躍學宮前外泮及玉印橋久廢慨然
修建之記見藝文栗榔渡乏舟實厄行者志金造以濟
歲加修葺置秋地五畝屋三間以贍舟子至今賴焉乾
隆戊寅奉 憲勸捐社穀志金出三十石以倡又修孟
家灣石橋捐養育堂田價各計百緡己亥重建學宮子
太學生顯祖孫歲貢蘭拓修外泮移玉印橋亦費百餘
緡後其孫增貢藻蘋湖南試用縣丞繫復加重修今曾
孫教職宗棣太學生承休同姪職員廷賜姪孫英翹翥
恕捐獻安樂書院計費幾二千金人咸稱後先濟美云
余志達字聯泗邑庠生長樂鄉羅坪人豪爽有遠志博觀

史事論古人得失權衡不爽會制府黃檄修縣志達思
肩其任適州同盧璜獨任之後鄒稿既廢達卽欲釐正
未得其人歲己亥檄修郡志邑紳以縣志請其子相輩
奉遺命出金五百以成其志達性慷慨緩急可恃嘗捐
社穀百石周鄉里建書屋課子姪時論高之助修義學
見學校志長子廷相字茂林次子廷楨字卓林三廷傑
字賓吳均太學生有父風有傳見藝文

盛賡瓚字漢賢坊市人鄉賓性嚴厲雅喜人讀書姪超家
窘束修資斧皆仰給於瓚無難色修上坊街八十三丈
四尺下坊街五十二丈四尺詳城池志

葛天儀上南鄉羅溪人平居樸素自喜不與物爭自少至
老足跡未嘗至縣庭乾隆丙寅捐修縣署前石街增置
冠蓋橋欄杆費二百緡邑令嚴在昌旌曰善聲載道戊
辰橋圯儀慨然獨修費一百二十緡後又助修義學詳
學校志子五人效洪太學生青園牧予咏周封職蔚初
能繼父志重修縣前石街冠蓋橋與捐南昌試院京師
試館倡捐社穀主修族譜共五百餘緡道光三年其孫
曾輩又費三百餘緡重修縣前石街冠蓋橋其世有義
行如此孫鏡崖懷星華運詳後

李宗平字啟喬年豐鄉太學生負幹才長於會計惟以利
物濟人爲事城西七里山當孔道日久崖崩路仄平修
治可容車馬瞿梁石崖壁數仞下臨深潭平鳩工鑿險
竟成坦道事詳雜記團潭水勢橫甚平架木爲梁卽漂
去平思垂久買石於南康之星子舟三易始達越二年

工訖費八百緡又下溜湖山東源三山諸橋工費亦如之凡修大小橋四十五座行者誦德城中興廢事平量工之大小慨捐弗吝屢舉鄉飲人以爲積善之必昌云子瑤瑋瑛邑庠生璠監生孫修邑庠生曾孫暉監生

葛鏡崖號靜軒南鄉人生有至性七歲失怙節母黃畜之嚴先意順事色養無違依依孺慕垂五十年處兄弟友恭怡悅推及師儒明允篤誠故凡文人來南鄉者樂於親近湖北孝廉羅德焜邑學博盧藹吉贈詩曰知君愛設陳蕃榻曰儀瞻君子賦鳴鳩皆紀實也嘗平居謂子弟曰諺有之虧要人吃吃虧者不是癡予常服膺斯語是以持身涉世精明渾厚不立崖岸較橫逆族戚故舊提攜成立者甚夥創祭田治橋道施棺修塚視力所能爲者勉勉焉惟恐不逮厥後如文廟戟門貢院號舍縣市石道城垣神廟各大工捐費計千餘金書院膏伙賓興會南門義渡旌陽宮鄉文社家社學各田租捐資計二千餘金雖由哲裔善承要皆其志事云子方泰監生先期耆儒方拔廩生方掄舉人大挑試用知縣方授職員方攀方採俱監生孫盛鈞職員利賓舉人利民盛輅俱增生

葛華運字偉渠南鄉羅溪人太學生有幹才弱冠失怙棄舉子業摒擋室務事母以孝聞與兄懷星極友愛年二十八疾革因母在堂囑以麻衣草屨殮書讀書最樂行善爲福二語示兒輩擲筆而卒先是其父貢生 贈奉直大夫咏周豪爽好義嘗督修縣城隍廟馬濠洞路復

偕弟蔚初修仰山殿石橋倡捐書院膏火鄉南文會二圖試館及邑城旌陽廟田華運實贊襄之華運又捐錢八十緡修文廟戟門兼勸親兄翠谷出四十金助之成旋聞省垣增修貢院號舍遂慨然遣人輸銀貳百伍拾兩他若邑南門石街義渡各社學田租大小賓興會田租費至千餘金亦無恡惜子方振歲貢生方暢方藻俱監生孫利仁邑庠生

潘崇桂字上攀號紫莽坊市貢生爲人瀟灑明大義遇事慷慨自任邑中大小公事悉倚賴之文廟向沿往制無能爲力乾隆己亥署丞許達以形家言同紳士倡義更張桂欣然應命獨修大成殿高華壯麗迥異舊規計費千緡先是桂住宅蔽塞義學門前公議予重值桂不受遽撤屋以基獻復捐田資膏火鄒令躉之癸巳修南

昌試院捐四十緡爲倡又建北門白馬廟茗洲港葉三廟善行不可枚舉子江由庠生授布政司理問重然諾有父風於伊源小旗坑修石橋利行人嘉慶間孫曾重修大成殿看鶴橋圯孫運第奉母氏葉命重建崇桂有傳見藝文孫顯祖太學生運型庠生號荷圃舉孝廉方正未就老猶勤學庭訓多方偕兄弟獻賓興館基運第辛卯舉人由教習卽選知縣曾孫文鏡文鐸並庠生文鍊丙子舉人揀選知縣文鈞太學生

李适字南恭長樂官田人初家貧獨養其母不問諸兄旣頗裕益爲周濟事乾隆癸亥饑出粟賑其族鄰爲鄉里倡族有窮嫗負責鬻子婦适爲償其負且給衣食以保

全之婦感其德嘗祝曰願天生賢子孫以報善人云已而子兆補諸生鼎太學生

鄧綱字尙章坊市人沈靜寡交遊長年不至街市閉戶讀書心得處片語解頤聞者心豁父吏員正選聯集諸人爲卹亡義舉凡施棺木二百清明中元封塚設齋歲以爲常置田十餘畝以贍其費綱紹父志經理其事始終不苟焉

邢繼煒字翹楚號慎齋江陰鄉南衝人敦倫紀兄雖異爨生死悉資之字孤姪如子分給產業同里有鬻妻者聞卽周之夫婦賴以全嘗修砌南路費百餘金乾隆癸亥庚午饑皆傾廩以全族鄰又倡建醴泉書屋置田十餘畝資同族膏火冢子蔣邑廩生

夏以壘字可南昇仁鄉人善事父母睦兄弟年未三十失偶家頗饒咸勸續娶壘守義終身鄉里具聞邑令劉宏畧以文嘉獎所居近瑞昌興國孔道崎嶇處輒修爲坦途又建石梁兩道周急濟困多義舉焉孫曰瑚邑庠生曾孫雲太學生

張必達安樂曲池人性淳厚不履公庭自奉儉遇善舉則不吝境中吳楚通衢伐石修葺十餘里乾隆乙酉饑人食土出數百緡越境買米減值以糶全活甚衆子光祖貢生善讀父書尙稱濟美云

熊廷像字有儀上南鄉沙墩人少貧苦積勤致贏卽以濟物大湖塘山路險阻延袤五十里捐貲督修三次行人德之初艱嗣後生子五臨終猶囑長子圭修祖祠濟貧

乏平道路毋負吾言子飛夢邑庠生豪爽有父風焉

鄭應坤字瑞天年豐黃沙人幼失怙以儉約起家事母孝

僻處縣西人多勤稼而罕務學坤延名師課子聞邑中

建義學賣產捐五十緡為一都倡復捐社谷及養育二

堂諸費年八十子之良為邑諸生孫曾皆業儒

雷尚樸程祈川車朝選雷鐘鳴俱年豐鄉人家素豐在鄉

村多義舉及捐田捐穀諸事乾隆己亥建文廟重新宮

牆卑隘不足壯觀乃徇眾志捐建品字石坊一座高三

丈濶四丈琢磨工整鐫鏤精細凡費三百六十緡闔邑

踴之其子弟皆遊庠序云

鄒遠福字右寧長樂鄉人性渾樸好施予多捐棺保婚事

隣有因誣被捕者妻將產舍單無措福憫之使人持金

追屬捕卒縱其人還妻果難產幸夫歸得母子俱全又

伐石修塘家塢路橋不惜多金咸以長者稱之

龔國輝字炳文年豐黃溪人事母以孝稱丙子歲饑出食

穀賑荒不給復乞糴以益之鄉里稱惠邑令宋調元額

贈利濟可風邑中建義學嘗捐銀三十兩詳學校志鄉

立社穀捐以為倡又捐建養育二堂費慷慨出之無難

色孫奎璧元均貢生

王德光字應奎江陰鄉東溪儒童少即好施黃沙嶺路崎

嶇欲修平之疾作不果以屬其妻潘氏潘坊市潘德煒

女也年二十而寡克成夫志捐百五十金伐石修砌長

里許建石亭於嶺上為憩茗所且買地構屋亭畔以守

之邑人高其義名曰淑惠亭初生子允疆甫八月光卒

潘矢志苦守先疆弱冠天立姪孫繼嗣焉

盧鵬字東石長樂港下人少能文章試輒冠軍督學拔置諸生第一性慷慨樂施予從兄某幼失怙恃家產一空其父撫育婚娶之鵬復分給田產母姪某稚年孤子鵬遵母命攜而教育之及冠始遣歸至濟急解紛事不勝指云

李筠字凌晃北鄉建富人少穎異讀書有識爲太學生應舉有聲嘗畱心文廟病臨危囑其妻曰吾意所欲爲者在文廟與族譜耳後遇此舉當輸金以助乾隆己亥修文廟其妻盛氏太學大猷女也明大義捐助百金族譜亦如之殆克成夫志云

李華春字鳳彩安樂鄉井隴人少讀書試輒有聲每畱心後學建義塾置學田以垂久遠慷慨多懿行建武界有

廢梁獨購石修之費重金七十時檢債書未償者悉焚之一日語家人曰某月日予別矣屆期果然聞者墮淚

子吐蕙孺童吐芬及孫時茂俱監生曾孫鴻業邑庠生

蘇起達字志林下南鄉人太學生年未三十喪偶二子彬彰皆幼弱或勸再娶以撫少子不聽遂守義終其身苦積致饒而捐助不吝造南渡舟舟子歲有常給人悉稱之又縣南三里建南灣石橋一座

盧鳴鳳字約麟長樂西坑人太學生家故豐自奉甚儉獨好爲利人濟物事乾隆乙酉饑出穀二百石賑其隣族邑中初立社倉卽捐穀若干以備賑又嘗修劉家嶺路費數十金再舉鄉賓不就士論高之

劉宏集字孔臣北樓源人鄉飲賓北源去縣治三里許舊有雙忠廟每歲漕運發舟前一日邑令親詣致祭載在祀典後廟圯僅餘故址不堪展拜集捐資獨修費百餘金邑令萬友正有記見藝文

舒順豪字勝萬南市人居家有法與人無爭競每歲饑以積穀減直濟人所營產業雖印券亦聽贖有輕贖而重售者豪不問人稱南市長者子芬郡庠生芳邑庠授千戶

余元壽安樂鄉陂田人少孤傭力供母乾隆庚寅六月母患痢頗亟洪水驟至壽負母登樓水益高樓圯壽一手抱母一手挾柱浮出修江至大橋灣約十餘里適取浮薪者救之母子俱無恙痢亦竟已人以爲孝感云

魏良韜字六文上南鄉桐坪人貧難就傳讀書三月父病遂歸日自刻苦好問稍能握管卽傭書養親然聰慧過人記問頗富人有以絕句難韜應聲對之悉有深趣後勤儉謀生家少有則修理古墓敗榭計三十有六塚男子七各專耕讀趨庭不假顏色與妻楊氏皆享耄年卒之日哭奠孫曾至百十人鄉隣稱嘆

李盛林字禹疏安樂鄉一都太學生博覽書史臨物靜鎮不撓有餘財輒以畀人尤喜恤幽扶存帥先出力外舅汪氏支屬旣盡墓纍纍在荒棘中林買地其左歲使租入而祀之婦之孀無子而貧者守節立後爲釋其重負其好義洵不可及云

盧之鳳字萬元長樂鄉峽水人邑廩生有膽畧能任大事

武自萬歷間設差馬十三號歲派費數十兩極爲民累
鳳偕九鄉上書撫憲起順治四年訖康熙元年始得改
爲汎站而差馬之害除縣下漕兌苦逆挽便準之設亦
鳳刀也

劉光遠字聖爵龍溪人太學生幼穎異喜讀書所交遊皆
邑中知名士每與文人詩酒流連款洽彌旬如一日有
族某負遠重責遠不問適以他債鬻妻遠聞之置酒召
索者出金代償且出所負已券對客焚之其人亦感悟
焚券去又建石梁修祖祠諸義舉不一而足至色養母
氏待兄嫂諸弟曲盡友愛尤嘖嘖鄉里子錫嘏邑增生
錫盱字周佐有父風孫炳中曙樓會孫金瑞承貞馨藻
元會逢辰皆邑庠繩祖太學生

章洪輔字雲標順義鄉仙潭人少孤奉母竭力供甘旨母

老臥病數年侍養扶持不假手他人嘗捐金倡建宗祠

修祖墓及仙潭紫瑤孔沸臨江諸石橋構摘星園課子

孫至隣有負債不能償者焚其券子庠生炳郁贈登仕
佐郎孫選青已成國

學生慧翺廣東雷安道庫大使曾孫世紳附貢世芬廩
生世芳職員世華邑廩元孫文喚職員文治文暄邑庠

熊上珍上南鄉沙墩人大湖塘山路險阻延袤五十里往

來苦之珍捐貲督修三次遂成坦道行人德之又捐修

義學銀三十兩見學校志

楊參逢字迪玉順義鄉岳溪人渾樸謙厚好施與嘗捐金

修岳溪橋遇歲歉出粟以賑姪垂青聰慧好學逢引之

教誨能文章隣人先鬻田於逢後取婦乏金還其券俾

別售以資婚鄉里咸稱頌之子嗣鳳太學生孫蔚蘭俱

邑庠生

余海士下南鄉人慷慨好施緩急可恃尤喜親近士人每課子輒曰我輩讀聖人書識幾行字勝於置產十倍矣若修葺文廟不可不勉其子燕山以家教捐金修補丹墀石面二百五十九丈煥然一新

余文演字定臣安樂鄉暉浦人性厚重然諾不二家居敦友愛獨力營產無私蓄尤好施與遇公事慷慨不吝捐田若干畝資豫寧書院膏火又捐貲修陂田大河兩橋後重修文廟子監生焜捐金以助人謂有父風焉

張達源字放泉應遊姪爲諸生沈潛刻苦甲子備薦七試優等皆以事故支吾未得食餼後多病子息頗艱遂淡於科舉庚辰同益堂諸子倡修文廟闢宮牆數十武填窪伐石爲堤因溪水爲外泮規制一新教諭蔡有記病革時囑家人曰吾又及見修文廟惜不能助一臂力爾輩勉之遂沒子道樞甫二歲妻盧氏承夫命修文光

祠

萬祁字孔有下南鄉中堡人讀書能文應童試輒有聲然豁達不以一矜爲意惟日讀書種子不可失督課倍嚴尤慷慨急公邑中修文廟將竣祁遵式置四配十二哲崇聖祠木主刻畫精緻如期入廟又修節孝祠皆軒敞可觀子邦達邑庠生

余滿臣號敬齋羅坪人爲人緩急可恃好行善事境中靖公厓最險峻滿修治至再及橋梁傾圯輒補葺之不居名又能通有無不計盈縮遇歲歉分給錢穀鄉里賴焉子廷輝廷煥均監生復助修文廟

胡方繡字美文順義鄉苔溪人父早喪事母能孝母卒停
 柩在室侍寢數年不少懈嘗平治道路修石橋幾十餘
 處計費千金乾隆庚寅饑出穀五百石以賑穀貴令子
 孫減值糶之屢舉鄉飲族黨咸高其義云曾孫文達文偉俱邑庠生
 翁旺祥字瑞信安樂鄉四都寒塘人少負氣節不諧俗長
 以勤儉起家悍者穉者不畏不侮人多頌之隣有遺孤
 產為豪所併祥毅然出力還之鄉里咸吐氣其生平行
 事率類此孫山翠監生作舟邑庠生復助修文廟

徐躬膺號雪峯江陰鄉人豪俠好義豫寧書院之初建也
 膺首倡捐田六畝有奇一時聞風接踵至今薪俸賴焉
 家頗饒鄉里貸其穀數百石不能償輒焚其券有某姓
 僅一子鬻於膺數年長成念其祀絕還身契令歸宗後
 該娶人終疑為僕也膺力白乃得娶又精咽喉諸方藥
 濟人至老不衰云

余芳字宗嶽順義鄉吏員性喜施濟隣某售田與芳負佃
 租將鬻妻償芳免其租更還田券給錢穀俾得生全如
 是者不一仲子致治太學生好為義舉初建豫寧書院
 督役捐金詳學校志又倡建紫瑤橋費百緡丙子歲饑
 石市穀價踴貴治貴糶賤糶價賴以平季子敬任樂至
 縣尉聞邦人之修學宮牆也札諭致治之子太學生瑛
 董其事子彪庠生

汪瑞臣東井人雍正己酉代賠某都逋欠三百金邑令田
 給匾獎之為社正賠穀五百餘石又瑞昌交界地名飛
 灣路窄捐銀百餘兩以修隣某鬻妻償債瑞臣捐助以

全併贖田八畝以活之乾隆九年膺鄉賓子應達候補
經歷

陳鳳騰字宣和邑增生北門人嚴氣正性不妄與人交自
幼失偶家頗饒終身不續嘗曰婦人當守節丈夫獨不
當守義乎經理豫寧書院一役獨力撐持食息起居與
工役同甘苦費數千緡毫無虧短鄒公倚重之稱爲一
邑長者弟鑒彥膺約正謹身率物人目爲難弟云

張觀化字冠五城市下坊人慷慨好義聞邑令萬公培補
下砂卽贖回所售地十畝以獻邑令給匾以獎禮數獨
隆

夏開字太靈昇仁鄉樟山人四世同居開子壘字可南事
親孝推產諸兄弟不私於己年二十九妻歿終身不娶
與父開親見四世同居云 府志

李元德安樂鄉人日負鋤修治境內道路如紫鹿嶺青牛
峽開山鑿石寒暑不輟如此者三十餘年一日鑿石傷
足痛甚遇異人背葫蘆出杯酒飲之良久愈人以爲神

府志
新增

夏曰瑚字帝謨號鳳岡昇仁鄉夏家橋人邑庠生幼知重
倫常父鼎奇之鍾愛倍至瑚尤善體親志親沒葬祭不
敢少有失禮入泮時念祖壘屬望之切而不及見也嗚
咽不已治家有法弟三人籍策書從昆弟二人學舉子
姪孫曾若干人聚處雍睦邑令石儀亭李澄江先後過
訪見庭榜六代百丁共爨五傳四世同堂句勸請 旌

未果道光三年邑侯陳雲章廉其孝友贈額曰義門遺軌初邑修文廟志書及大河橋夏家橋俱出貲任事郡志之葺也復輸金焉又慮鄉里吉凶禮廢舉呂氏鄉約勸正之某年傳有穀神自他郡來人爭迎祀瑚斥爲妄卒不從其剛正有若此子雲太學生嘗與修武廟城隍祠文峯塔孫郡庠生賢品學均爲時重廬母墓後失偶不忍再娶鯨居四十餘年時抱綠綺鼓清泉白石間流音古淡肖乎其人著有滄螺詩鈔行世五倫譜待梓方洋字西臣號達菴例授修職郎北鄉烟港人幼時負米讀書鄉塾父病蠱乃解歸奉湯藥者三年父愈又三十年而後卒洋因侍疾遂廢學力農嘗燈下手論語曰首章吾不能學爲次章而已奉母孝甚弟瀚後洋十五年生友愛異常擇師教之且資之遊豫章白鹿學益進乾隆戊申夏瀚試洪州得入泮洋方喜迎弟無何母歿妻亡洋亦幾濱於死造次顛沛於附身附棺之物尤必誠必信焉嘉慶辛酉瀚舉於鄉屢上公車皆爲辦資斧務使有餘弟歸則依依不舍偶有佳味必待弟至乃食姪六人婚教一如已子鰥居三十年不再娶父母諱日屏食深居惠族卹鄰無少懈自奉甚約於義舉則不惜重貲如修崇聖祠京師試館鄉賢鴈里祠皆捐金倡建同里處士張望廩生陳懷雅愛重之年七十二而歿無片詞及官家人檢遺衣得一束外書視此猶生四字蓋洋母氏所手紉也迄今稱孝友者無不推洋弟瀚吉安府訓導子觀試用教職瞻國學哲增生孫迪崙歲貢生

立宜縣志 卷二十一
銘教副貢生

車必秋字瑞岳年豐鄉九樓村人父早喪傭工奉母飲食起居如母意夏則扇榻驅蚊冬則煖衣溫被三十餘年未嘗出宿於外母歿哀毀骨立合葬父壟每遇佳節陳酒肉跪奠墓門如事生然除夕燔柴塚次獨坐達旦謂之陪歲貧不能娶年五十四而卒邑處士張望有車孝子詩廩生程銓作傳平彝宰王子音榜其居曰孝子之門

聶標文昇仁鄉楓田人性醇樸待人不設城府治家井井有法秀良者納諸學否則或耕或賈各有所司臨歿時猶誥誡再三今子姓兄弟交相友愛六世同居道光三年邑侯陳額曰雍睦可風

冷復泮字樂采坊市人父太康見背母王患風痺疾僵臥牀蓐者三年時伯子就外傳仲子持家政泮左右扶持藥餌嘗而後進母性嗜潔理髮濯足不假手他人或曰子事親媳養姑職也櫛沐之事盡委諸婦乎泮曰必如是而後吾心乃安也及歿哭泣如孺子鄰里稱之無閒言云

盛元績字蒼霖號熙堂坊市人操守嚴正雖居城市非公不至官解工詩文著有復初文稿北遊詩鈔新吳鄒西麓南康謝蘊山恒敬憚之曾賓谷江西詩徵多採焉居恒善事父母友于兄弟與兩昆處終身怡怡且共營生壙於父墳下不溝不樹有姜被同眠意族有徙居分寧者老而貧託以幼孫與孫婦攜之歸授以藝事成立而

後去邑中凡大興作如 文廟武廟城隍祠皆親董其事乾隆戊戌分纂縣志丁未大挑二等選授峽江教諭教人以讀書立品爲先峽邑士民至今誦之子學暢邑庠生學杰學烹並太學生杰號輯凡屢赴秋闈不第而天性孝友好學力行至老不倦年近七旬舉鄉飲介賓如其祖前令朱贈賓筵繩武額烹見後孫詡由附貢授試用訓導翎太學生

洪崖字象眉昇仁鄉中村人品優學粹乾隆戊午舉於鄉已未與邑人余騰蛟應試 京師才名噪甚卒不遇歸益閉戶讀書集其父邑增生文偉之文與已所作編爲行恕堂文稿人多傳誦孫洪冰邑增生

盧金鏡字葯壘號秋水歲貢生長樂鄉中潢人弱冠入郡庠尋食餼文名噪江國屢應鄉舉不遇比部余騰蛟聘爲子弟師主賓竹堂堂藏書甚富金鏡課餘披覽學益淹通發爲詩古文詞確有原本一時學者翕然宗之乾隆某年編邑乘金鏡與有力焉生平行止端方年八十餘猶手一編嘗語人曰身可窮名不可朽也著有鑑畧史趣孝行錄題襟詩集才調文集已付梓者秋水詩鈔周易外傳邑人張望爲之序

葛懷星號霽西南鄉人生平兢兢自守取與不苟爲諸生時力學應鄉試三薦不售遂止相廬旁築室數椽以課讀自娛額曰允懷于茲姪振歲貢生幼孤積學有成多得力焉旁通岐黃家言求者屢滿戶外貧給以藥愈不受謝死無殮具者賻以棺愛人勤懇歷數十年如一日

殯之日遠近爲之臨有痛哭失聲者其他義舉如文廟戟門文光祠正誼書院及各社學縣賓興會鄉賓興會捐資不下二千金嘗憾無以顯親廼由增貢生援例授州同加二級父母皆受五品封誥子方扶監生方持職員持嘗捐田租倡成惜字會又爲焚字紙石爐約費百餘金殆克承先志云

杜茂官北鄉大塘人少侍父病湯藥弗瘳焚香割股以進尋愈暮年樂施嘗設二斛出斛一石百升入斛一石九十五升命子孫世守至今弗替子佐商貢生鄉飲正賓眉又監生乾隆辛未邑饑佐商出粟二百餘石活人又出重金伐石修下坊街道自迎恩門至看鶴橋縱橫四百餘丈佐商子錫圭監生獻書院膏火田捐金倡修義

社錫圭子應山監生束宇邑增生學涵貢生京師修豫寧試館學涵捐金襄之又獻正誼書院膏火錢百緡學涵子蘅監生秦華郡庠生 學宮修崇聖祠蘅捐金襄之蘅子中維邑增生中毓郡庠生中恒監生中慧邑廩生春華子中黼邑廩生中黻中贊中助俱監生以其祖學涵名捐賓興館田租四十石中贊子華玖童生以其父名捐賓興館田租二十石道光戊申中毓子華斌邑增生中黻子華祝邑庠生中黼子華瓊監生謀諸應山東宇學涵孫曾中情中谷華旭等以佐商義塾公項重修下坊街道計費四百餘緡論者以爲累世克承先志云

李青字蟠仙號慕蓮郡庠生年豐鄉櫻田人少力學繼先

志構書屋曰松齋遠近從遊士貧乏者給以膏火與兩弟角力以進有聲庠序分寧太史周白亭慕其品學聘爲童子師里有孤子貧不能娶蟠仙出資爲之完娶又念家乘殘缺廣爲搜羅以歸完善歲歉散財賑恤至今人猶頌之子惟坦惟旦太學生

邢家屏字掄升號默齋歲貢生江陰鄉人性嗜學洞悉程朱奧旨邑侯鄒見其文以大器期之因助資斧就學鵞湖書院名益振後鄒遷他邑欲與偕行以親老辭教授鄉里賴以成就者甚多恬靜寡欲貴介造其廬恒趨避之

汧士全字性備歲貢生昇仁鄉石橋人弱冠入泮學使周試列高等賞其文付之梓屢躋鄉闈人品端方足跡不履城市教授鄉里一時文人多出門下嘗倡修雙嶠山路寺亭好義者響應至今行人賴焉

張明遠字愈謙號近浦邑增生安樂鄉曲池人通經史善詩文棘闈屢薦卒逸其卷以終居家履道貞素無迴曲里有不直者見之皆斂手避曲池人文寥落明遠與族人鳳誥等釀金聯會置田六十畝資膏火相地俯江築曲池義塾培植後進以故科名文士駸駸日盛年六十五歿子嶠邑庠生

張問達字冰瑩號水山安樂鄉黃陂人少失怙事母孝弱冠補弟子員旋食餼授徒曲池書院從之者教之以行誼被之以詩書爲文一宗先正收離糾蕩一時陶成甚衆卒之日諸子弟釀金以葬反粟主于俯江樓以達嘗

登樓望母也子嗣廩膳生資稟奇慧長於詩古文詞惜年三十餘而卒南豐譚尚忠中丞爲之傳父子有合編文稿曰枕松遺集孫文思邑庠生

盧兆明字鎮南號臥雲歲貢生長樂鄉中潢人少有文名銳志進取就學於楚南靖太史道謨及讀書白鹿洞書院與樂平胡翹元鄱陽史珥相友善卒困棘闈歸築環碧家塾廣構圖書日夕率子弟搜討古今生平以敦倫爲實修葆性爲真詣邑侯黃蒞治額四字贈之曰道氣迎人乾隆壬寅葺郡志太守黃下牒徵聘與太史熊爲霖任分纂書成莫不稱善著有左傳聯珠春秋旨要子志蘊邑庠生

方煥字宇徽號蒞吾歲貢生江陰鄉人性溫和無世態周旋習博覽經史獎勸後進以行誼爲先勸同鄉立文會春秋會課定甲乙嘗分任前志多所參考詩文不自珍惜所刻惟毛詩釋物學憲王有序見藝文

陳懷字穎聞號竹門邑廩生北鄉梅林人家世讀書量寬而行卓縣父以文字招一往不復至年四十餘妾生子乳母失意殺之置不問曰吾德薄故假手於汝里有以非禮犯者旁爲不平促白官懷膀子與三自反於門其人愧悔請罪平居能以德化鄉里治家整肅雖困乏於朋友宗族必周卹之屢應鄉舉未遇年五十有四卒無子士林惜之與房弟雙南友愛著有辛亥小錄行世

李蓋字素波號初堂歲貢生北鄉人品優學粹少時窶甚偕茂才張錫明經王子音游鹿洞事鄱陽史滙東太史

下帷攻苦業大進嘗踰月走數百里省母同學益器重之既授徒家塾有劉生某負才貧不能學招至門下食之教之卒有成女孫阿芸適田氏子侍姑病割股以進事聞邑令尹悉其家教所自遣使敦迫堅辭不往其生平耿介類此有初堂文稿行世

余光策字省之號霖岑邑廩生長樂鄉璧田人人品方正學問深醇所著有四書題解金陳合稿評選皆足啟發後學課授山中及門有爲境限者不計修脯且飲食教誨之邑東紳士多出門下督學趙鹿泉先生梓其文人多傳誦棘闈屢薦不售甫及貢而卒子鳴臯乙酉舉人天資豪邁家學淵源作文力追先正尤守正不阿耻隨俗爲俯仰

張光昱字綬揮號釀闕邑庠生安樂鄉曲池人力學能文性嗜酒醉卽縱談古今忠孝廉節事令人悚然敬聽家貧僦肆窮溪爲逆旅主人有瑞昌客館焉一日弄千金於篋寄其肆約期來取無何大雨水漲光昱具舟命子弟先舉客篋以登轉瞬閒肆已蕩然矣後客至出篋與之客曰肆委河伯吾篋獨存微先生之義不及此請分金酬之光昱笑曰吾豈舍多而取少乎麾之不受客感謝而去

盧兆鯨字麗山號鏡舫邑增生長樂鄉中潢人性敦厚處庭闈盡子職繼母張患風痺疾三載飲食湯藥調護備至生平急於公義乾隆癸丑郡修文廟鯨與同邑翁顯祖合建大成坊費千餘緡龍石港爲南道通衢石橋

毀於水鯨倡捐百金復修之歲饑減價出糶鄉里咸利
賴焉兩舉鄉飲不就曰吾恐德有未至也

李兆字映奎號西竹邑增生長樂鄉官田人讀書能文樂
善不倦有友邑庠生黃江者子孫俱故兆念其貧而無
嗣買田付黃氏親屬爲江承祀祭掃資乾隆乙卯外舅
黃文五三子先後歿僅存一孫飲食教誨倚於兆家復
築室購田畀之且爲完娶嘗於虎山麓修砌石橋費金
百餘及歲歉靡不盡力以濟饑者其弟鼎字林元號西
溪太學生負幹才裁決悉當延名師課厥嗣張望跋其
岡映堂云魚川而泳之鳥雲而舉之蓋况其後賢也

京師洪都建鄉會試館不惜捐助重金邑 文廟彝倫
堂規模狹小遺命後嗣遷建宜高大其子太學生雲青
捐修焉仲子峯季子雲交孫良瀚皆邑庠生

翁顯祖字芟雲號湜園太學生安樂鄉下泐人家素封樂
善不倦兄嫂早世遺孤蘭不委以家事俾壹志讀書翁
氏有譜久殘缺獨力修輯之與喻某友善某得瘵疾彌
留以老母幼子見託喻沒攜其子至家飲食教誨如已
子且爲其母治喪事凡於義舉無不慷慨從之如修邑
聖廟郡學 大成坊貢院號舍 京師試館栗榔義渡安

樂社學田畝與育嬰堂漏澤園鳳溪橋昭應廟看鶴亭
及邑侯王軍需各捐費不下二千餘金縣志及各碑碣
多載之子三長藻次蘋皆增貢生三蘩湖南候補縣丞
合捐正誼書院田租百石 撫憲程 藩憲卬給以扁
額優獎孫業承烈承勳承杰俱監生承耀候補縣尉宗

棟候委教職宗榮儒童宗樾邑庠生

余廷楨字卓林號環溪太學生長樂鄉羅坪人其高祖仲岳嘗率鄉勇佐官兵禦寇事詳定變畧曾祖德友授田畯再飲於鄉楨固素封少力學爲文寢食先正援例應鄉試不遇里族人文多所資助族姪虹與韻珊兩孝廉尤加禮焉嘗遵父遺命主修梁志出多金以贍京師試館他如靖公崖長墅源路洞溪港鳳口港龍石港橋共捐數百金乾隆五十年旱荒減價平糶以活鄉里人皆德之常以仁義訓其後子琬邑庠生珺附貢生珽候補縣丞振采廩貢生委署教諭克家州同孫紹業厯署經歷巡檢才雄氣俠樂與士人交餘詳藝文傳

張立元字旭煌太學生坊市人三歲失怙母盛以苦節撫之稍長讀書家貧未卒業營貨殖家漸豐事母最孝母聞南渡街路崎嶇嘗竊歎之立元承母意修百餘丈遇歲歉出穀減值以售冬日施絮衣周貧苦有稱貸不能償者焚其券他如修祖祠捐義田修橋路理荒塚施棺榇指不勝屈凡遇佳子弟必飲助曲成之族姪大鵬未遇時目爲大器贈資斧習騎射後果以

殿試第二人及第大鵬深感激嘉慶己卯恭遇

萬壽覃恩大鵬以本身妻室應得

封典

貤封立元爲武翼都尉妻費氏爲淑人長子紹璣

誥封武功將軍原授教職厯署縣教諭府教授事次曜璣分發湖北候補縣尉厯署縣丞巡檢事孫向辰邑庠生向

斗邑增生議敘通判向仁議敘同知今其子紹璣捐修
上諭亭主修志乘共費四千餘緡殆克承先志云

張鉞字元凱號虞臣安樂鄉曲池人少聰敏日讀兼人以
家無儲糧從事於畝畝其七世祖洪溪遺窮溪市廛日
久而敗無人經理鉞商之宗人啟珂召匠新之歲得儻
直數萬錢買田入租若干石春秋聚長幼告虔於廟坐
而飲酒修尊卑之序餘租歲晚分散族人及孤兒寡婦
諸困乏之家後人因其資建菖蒲書屋於山梓岡今洪
溪子孫四十餘戶無啼饑號寒且有欣欣向學之意者
皆鉞啟之也子成筠邑庠生

黃應薰字賢佩號蒼崖北鄉塢頭人幼貧失怙善事母母
歿柩停野廬宿於側適河水暴漲柩將浮薰泗水往伏
柩上諸兄繼至扶柩登高阜下視水驟高數尺纔須臾
子母皆不救人以爲孝感云既居室少有造舟爲梁平
治道路力所能爲者悉任之年五十始舉一子未週而
薰死妻段氏矢志撫孤諸姪貧段兼撫之衣食婚嫁如
其子獻學田四畝有奇子太學生錫環聯修 崇聖祠
倡建家廟獻正誼書院併社學田有父風焉孫家禮舉
人德化縣訓導卓異知縣兆槐家詩元模俱太學生孫
先鐸增生

胡中清字式毅號賓崖江陰鄉長沙人家頗裕捐粟數十
石納諸社倉以備歲凶邑侯宋調元額曰利濟可風乾
隆乙未大旱里人至有掘蕨食土者中清出穀數千石
減直以濟邑侯梁鳴岡予四字嘉之他如育嬰堂經費

書院膏火一切義渡杠梁尤多襄助鄉里亟稱焉子秀
東孫乘銓邑庠生

雷至剛字若思號墨莊邑諸生由江陰鄉遷居城市爲人
耿介不隨俗俯仰而義所當爲者不待勸勉邑侯鄒以
朝元廢址建豫寧書院因後牆地隘剛獻地數十丈辭
金不受歲癸丑邑大饑邑侯宋集紳士議剛欣然倡義
約同志十餘人減價平糶全活甚衆後宋贈以匾加獎
勵焉子大經應時邑庠生靈精國學生孫秉春國學生
雷志雄字廷蔚邑庠生江陰鄉人性慷慨濟人利物之事
靡不爲之自乾隆丁酉迄嘉慶庚午三十餘年歷修橋
梁石路一十八處崎嶇艱險化爲蕩平遠近至今德之

王鶴臯字餘圃號聽瀾江陰鄉鶴樓人少從李斐讀書字

雲巢爲字雲先生所推許詩文規撫前哲歷試不售益
務爲實學性孝友嘗客朱家山聞母病雪夜步馳數十
里及沒齋祭惟謹後尤得繼母歡父德倏患癰三載溲
溺於床蚤夜躬滌垢穢自病至終勞苦悲哀喪明四載
一旦勿藥而愈人以爲孝感所致伯兄卒遺孤一教養
昏娶如已出伯父母沒無嗣乏產商諸姪爲之立繼給
田以贍衣食同邑某授官湖北先後移數百金助之甫
抵任卒鶴臯爲售產代償并卹其母子嘉慶壬戌辛未
兩次荒歉鄰有貧不能舉火者量其食指周給之他如
建祖祠修孤塚一切義舉無不樂於從事云子佐廩貢
生賚自邑廩生孫萱副貢生贈蘭廩生曾孫策勳庠生
盛學黃字鍊機號小谷邑庠生坊市人幼失怙恃惟伯兄

職員嘉豫是依飲食教誨偕仲兄邑廩生學蘇唯唯受命一時有填箠之目已而伯仲相繼徂謝遺姪翹撫之讀書成立一如其伯兄之蓄已者學黃旣遊庠益勤苦好學屢戰棘闈薦而未售年將五十遭疾不起人皆惜焉彌留時囑妻吳男堦捐腴田八畝以租入爲邑文場鄉試卷貲署令范給藝苑揚徽額獎之

蘇世章字應明號鏡亭下南鄉四十三都人居心仁恕尤敦義行年三歲失恃父不再娶委曲承順及父沒遇生辰諱日必涕泣致祭所居邨曰黃土墩有是非必爲之反覆開導而後已家本素封造南河渡船給渡夫月廩設木跳於新洲修南市河干石道及南市嶺通衢捐儒學田城內旌陽廟田茶林山塲爲貧者厝地又倡修學泮池修砌名宦鄉賢前石坪及沙田中橋聯貲善後屢修家乘代輸丁費建立文塔率以身先年八十卒子遠法例貢生

胡大馨字嘯月例貢生江陰鄉長沙人篤親好義父母見背事繼母先意承志亦如所生前明諸生胡英良從祀忠孝祠無後墳墓傾塌僅存抔土馨召匠伐石甃成巨塚且立碑誌其生平族有孤貧而老者患病人不敢近馨親送湯藥旬餘厥疾得瘳甘家橋爲往來要路捐錢百緡建石橋捐穀四十石於社倉鄉里空乏之家無不周恤及卒遠近來弔者咸痛哭焉

張景瀚字秋濤國學生四十七都人工詩文性樂施善排難以時治道途乾隆乙巳早越歲米騰貴瀚出粟數百

石減直周貧乏媳邢氏生員承烈孫女貢生浣濤女先是承烈獻書院田捐建社倉浣濤復修焉里人義之氏亦好善有祖父風某夏里患火症出所藏冰全活甚眾畢大儀字九奇號善菴昇仁鄉人性孝友年十一事繼母曲意承順與異母弟大佑異爨田產器物皆受其劣者不數十年弟產業蕩盡儀給以衣食酒肉如未析時鄉里咸稱之孫文矩邑庠生

李呈菓字杏榮北鄉臨江人臨江爲往來要津向有舟渡取給行人乾隆庚辰杏榮輸金修造獻洲地雇工以濟西里許有梅崖橋獨力捐建約費二百緡其子顯名太學生鳴鳳竹筠捐本都社學田孫曾捐金襄修 京都會館及 崇聖祠道光四年獻正誼書院膏火田九畝

累襄盛舉至江省增修詞院號舍邑西七里山路鑿山

伐石擴成坦道則曾孫若瑤兄弟與有力焉孫廷恩太學生廷徽貢生廷標邑庠生廷楷職員曾孫爲翰若環若璇若瑜並太學生若瑤舉人候選教諭元孫熙春職員華林雲漾俱庠生

程鏡字賓雲號心聖年豐鄉人邑廩生在學有年次當充貢生平慕學不倦從遊二百餘人有聰俊不能卒業者教誨之且飲食之遂多所成立接人恭慎鄉鄰宗族咸起敬起畏湘潭尹吉生明府宰武時稔其學問人品雅推重之卒非公不至癸未歲分修邑乘不執已見不辭勞瘁乘未梓而病卒聞者無不涕洟著有四箴堂詩集

新增

熊鎮瀾號歐爐順義鄉歲貢生幼居坊市失怙謹事其母天性樸訥粥粥若無能及長讀書得閒每爲文鏘經鑄史出之學鍾王書人多寶貴門人張華甫守廬州鎮瀾勗曰守廬在安民安民在戢奸毋徒爲佔俾小儒也年六十授徒南遼山從者益衆華甫子富業時官衡山郵祝云三千里外依然化雨春風試問門誰立雪二十年來尙憶耳提面命終愧墻也及肩

楊光斗字文雪號冰園乾隆甲午舉人南鄉瓶源人天資高邁學問淵博今古詩文翛然塵埃之外乾隆壬寅分纂梁志足繼余盛兩家彪瀾藻采舉動倜儻脫畧樵夫牧豎油油與偕於友誼尤篤靖邑舉人舒日晨歿於京

都代殯殮扶柩南回舒氏家規歲以視田租三十石贍鄉舉者日晨旣死租當歸祠光斗因日晨妻子貧乏馳書數千言達舒氏祠舒氏感其言情至義盡給日晨妻子終身著有冰園文稿行世

余鳴珂字海碧號讓麓安樂鄉芳田人紹高曾孫崇曾子幼聰穎目下數行並工楷法比部余騰蛟司訓盛謨一見輒深愛之遊豫章書院與新建洪鍾朱紱新吳徐日昌同邑汪軻稱莫逆交乾隆庚子舉於鄉三上春官不第遂淡志家居嗜學不倦喜著述見邑鄒志燬於衆議偕孝廉楊光斗盛元績輩力請梁令重修菟羅軼事如宋侍郎邢凱舊志失紀覽通志有坦齋通編一則特爲立傳平日遇郡邑大舉若文廟武廟書院文塔及洪州

考棚皆不憚勤勞首董其事尤周恤鄉里值歲祲必多方轉輸凡破釜壞絮無不得升斗以去又嘗請邑令發常平倉以濟荒所著有芥堂示詩芥堂集人琴集

熊應周字叶時乾隆己酉舉人世居南鄉沙墩宅東有井在汙泥中澗然不滓故號東井狀貌魁梧讀書作文貧無師資嘗自肆力於經史百家得之領鄉薦後一上春官不第退而教授脩江上下弟子數百人每談古今時事罕譬曲喻雖野老亦知相士尤獨具隻眼嘗宿某生家伊族子貧將棄學以文質許其必成後果食餼貢成均其作人大率類此著有筆耕留餘待梓

鄧敏號六核邑增生坊市人核堂兄弟六核其季友愛異常邑諸生張翮寄懷核堂昆季詩云得書每共觀寡過互繩糾怡怡兄弟情今世誰與儔六核方童子時遊明經李白村門既爲諸生益肆力詩古文辭私淑張閏榻處士閏榻與白村書曰邑中古學一脉後起惟鄧生一人而已少子名莊能讀父書不幸早世故敏當晚年益落拓嗜酒醉後日手漢書一卷其他世事不知也著有拾遺文稿若干卷莊遺文數篇附刻卷尾

張煥璧號鍊石

勅授文林郎例晉奉政大夫少穎慧與

仲兄華英侍學伯兄實園實園與華英圍爐陳說經義遙聽輒解年十九補郡庠時仲兄已歿伯兄成進士官刑曹堂上具慶鍊石上事晨昏下庀家政枕藉典籍汲汲無少暇及循陔棄養哭泣幾喪明家故貧而性廉介長吏之堂非公不至或笑其迂拙晏如也生平艱於遇

而教人有法蒲坂孝廉張際會子姪富業富學富經俱及門而富經之受教最多科名仕宦悉本庭訓得免隕越尤工法書寸縑尺素吳楚間有出粟數石購之者洎從伯兄守廬時歸赴鄉試不挈僮僕或曰儉近固歟曰吾豈以兄之貴變塞哉嘉慶庚辰富經令霞浦福寧府僚屬謀所以壽之者遣伴迎養鍊石曰祖若父皆未逮七旬而吾幸至此每一振觸幾欲泣然流涕遑忍自鳴得意乎吾自有訓館餘積百金耳誕辰視乞食之無告者盡與之後亦不復往霞署也他如見同鄉步行會試者執手嗚咽贈以金遇隣里難產垂危者燃北斗燈解其厄篤學力行庶幾不愧云

胡斌字定夫一字兩峯長樂鄉瓜源人邑廩生大省子也

天懷敦篤於庭訓不少違既冠補弟子員遂以根柢之學嚴課後進凡五經精義及四書翼註口講指畫背若成誦一時遊其門者多通儒性謙恭寡言笑不妄與人交交者貢生余在藻上舍舒翼耆儒申秉鎔皆以道詣契稀齡益友善雖家履清貧而耿介不易其操太僕盧容菴嘗遊鳴鳳山與之終日講論不輟蓋心儀其爲人也

費鍊華號心爐歲貢生坊市人家貧嗜學制藝華瞻兼工詩古文辭鄉試屢薦而卒艱於遇善誘後學一時遊庠序領鄉薦者多出門下邑侯尹重其品學贈以楹帖曰心花怒發推名士爐火純青號大家及卒又以文章儘可追前哲古道猶堪式後生十四字輓之

余璞字慕湘號雪舫安樂鄉碧田人前明忠義尊大之裔幼失恃事父及繼母以孝聞讀書穿穴經史別有會心於文事靡不能尤工鍾王書法年三十補弟子員尋食餼秋闈屢躋以明經老課徒山中不事嚴厲造就甚多索書者踵相接頃刻揮灑悉如其意以去嘗曰人有一技一能期於適用吾書固不佳彼既來求聊以粘壁可也何慙焉居常平易近人雖臧獲無敢慢有以輕侮來者輒笑謝之人咸服其雅量云

余復字子肩號半鱸別曰莧根長樂鄉人年弱冠補郡庠生鄉試屢薦未售課徒山中一時英俊多出其門邑侯尹作翰以名進士宰武甄別人物十餘人推其品學爲最時加存問卒未嘗懷刺一謁其方正不阿大率類此著有龍鱗錄半鱸詩鈔行世爲得賓竹薪傳

張富業號磊菴坊市人華甫冢嗣父子進士性穎異刻苦讀書寢食俱廢嘉慶戊午恩科登賢書己未成進士以知縣用歷任湖南臨湘衡山縣事德政在民口碑載道當時有福星之目後以病告歸宦囊羞澁一肩行李兩袖清風晏如也

陳誦字硯亭一字今吾年豐北塘人弱冠補諸生肆力周秦兩漢之文所爲皆雄深雅健處士張閏榻語人曰此詞林大手筆也事父母依依孺慕時嬉笑以博其歡而友愛之誠篤焉以儒世醫饋貧病藥不名一錢恪承乃父志無德色居恒陶成後進歲得館金多以購書邑兩學博舉應孝廉方正未就以茂才終有北塘記見藝文

葉杭字蔚西號葦洲邑增生南鄉陽坊人性孝友祖母王
年八十餘病篤醫曰未知糞色若何已而王氏如廁杭
捧護之以一手承糞視其色並嗅之語醫施藥病乃愈
文課罷卽登先人墓宅薙草除棘數十年無少怠於昆
弟分多潤寡饒友于風生平未嘗一詣公庭友教南北
二鄉門下遊泮登賢書者甚夥年九十有二寢疾三日
與孫講孝經一章而卒

方瀚字月壘號春湖北鄉人由邑庠中嘉慶辛酉鄉魁第
六名舉人挑授吉安府訓導天性純篤父蚤世母歿哀
毀骨立遇生忌辰竭情盡禮事兄惟謹至老不衰常假
館馬崗兄至必戶迎反輒隨行二三里望間而止旣乃
構別墅顏曰陟岡誌敬也中年鰥居不再娶京羈六載
與邑盧太僕爲文字性情交同營武邑會館盧重倚之
鐸吉時太守銘禹門先生贈有皎若胸懷珠月抱澄然
心跡玉壺瑩之句蓋實錄焉生平著述以節義爲重如
釐訂家乘建雁里祠梓茝吾集力所當爲者靡不爲之
前令尹榜正士十人于公堂瀚名居首有以也夫

洪達豐字瓊九邑庠生昇仁中村人一生未嘗箕坐晚視
常聚徒講學學者見之官骸自肅然平易近人使人畏
而愛之年九十邑以鄉飲介賓舉却之曰吾儒一日稍
懈一念偶踈卽是過端昔管幼安以科頭三晏起如廁
一未冠自訟達豐蓋與之隱合焉

王顯仁字六成一字芥園年豐南嶽人由邑庠舉嘉慶丙
子科孝廉初爲文振采負聲如陣馬風檣勢莫可遏旣

而功深洗伐筆老格高闈墨三藝僅千字雲南制軍林少穆深契之試禮部未第邑太僕盧容菴稱其文追先正允宜南歸薰陶後起晚年忽涕零浹旬盡挈所作於溪瀨焚之旁某強取若干藝以去顯仁曰此豈足以問世哉性不事邊幅喜與兒輩偕作息袖經叱犢且牧且誦然負俠氣不屑屑趨附嫉惡如仇遇諸途輒屏之遇農人則拱立道左蓋以警游惰也其里水交滙處建二塔嶙峋對峙人謂之雙童聽講歲戊申邑增志乘同好者謀集其文付梓據拾將有待云

劉夢說字去埃號勿軒魯洞中溪人性篤孝髫年母死哀毀失形嫻黨開諭再三始輟泣然得隙輒往母墓哀號十餘年如一日見者咸爲之流涕及長嗜學志行純潔學問淵博當時名震江右督學汪瑟菴先生海內宗匠也深器之與邑張斌同郡萬轅陳爾烈宋傳曾稱爲文壇五虎五薦不售年未四十而歿汪公聞訃歎惜輟公者累日著有雨翠軒文集筆談諸書待梓

喻志恢原名柟字希宇號曉埜邑諸生鳳口人奉親以孝聞家貧讀書手不釋卷性端方不趨時尙跬步嘖笑不苟出言人信服邑宰皆重其人徵聘不一至流覽百家兼通天星岐黃地理諸書觀星斗洞悉尤善考據葺家乘者多就正焉教授門徒以敦品爲先務造就遊庠者數十人鄉試中式四五人入魁選者喻贊猷邱文蔚皆出門下著有曉埜詩文稿二集雜說一集待梓癸未分纂陳志任藝文事年六十猶赴省試舟次潮舍大江失

足落水浮水面順流數十丈不沉自言如有物負之者
人以爲敦品之報廩貢王佐贈壽聯云厚德延齡何妨
一劫安貧樂道自有千秋年七十三無疾卒自爲墓誌
見曉楚文集

余詒字燕之號翼園邑明經長樂鄉人性敦厚周謹少孤
與仲兄詠昇三兄誌並列膠庠扃戶讀書情篤孝友歲
科兩試屢冠全軍學使汪瑟菴侍郎三江立誠編梓其
文某歲秋闈於號舍中拾一千金券其人倉皇無措因
詰之曰子似有所失者詳核其數與券符輒還之其人
感謝復笑曰吾人行事豈望報乎其品行學問如此晚
年於谷心家塾課訓子姪皆英偉不減竹林七賢行年
七十未嘗以事干謁有司士林頌爲今之子羽云

張以字號珠人旭之其字邑諸生安樂鄉曲池人生有異
徵十齡應童試邑令石丞賞之旣師事宿儒張望學爲
古文直入堂奧曲池向有義塾曰俯江樓置義田延師
講課後以經理歷數手漸荒落字承衆舉爲之清釐積
有餘貲增考費修文昌宮奎星閣購試館省垣平日處
事寓精明於渾厚嘗爲母營葬地授值納券誨吉矣有
無賴子出阻曰是近吾宅不利居人衆爲之不平字曰
葬而訟庸吉乎且禍福不可測也未逾月無賴子家遭
殊疾連喪七人字喈曰若葬吾遭危獄矣衆乃歎服子
亨鈺原名汝霖由優貢補廣東恩平知縣汝雲丁酉拔
貢等中乙科授教職汝靈職員汝雯邑廩生

盧藹吉字毓嵩號鐵門別曰翹岡長樂鄉人其父太學生

琅尊師重道藹吉先意承志曉夜編摩無敢懈專事歲
貢余在藻十餘年藻嘗以大器目之歲甲子由邑庠中
式七上公車不第生平謙和與物無忤授徒鄉里咸謂
其桃李盈門戶部主政舒鼎尤所深契也卒以大挑二
等選崇義訓導爲士林所欽仰著有鶴頂園詩草行世
文稿待梓子燾邑增生煦業儒

王瑞鼎字器之號主園安樂鄉破石人少循矩獲務爲端
人其父子音宦雲南隨左右贊平夔征苗軍務邀頭等
議敘補湖北監利縣丞縣防水藉隄爲保障丞司其職
時春雨驟漲新市長堤不歿者二尺許瑞鼎率民夫晝
夜防護堤賴以安中間兼署縣篆嘗結大獄雖五日京
兆而來慕去思令人不能已監利石令卒因公賅累爲
分廉彌補同官義之所著有萬里征途記子慶祥慶餘
俱監生孫應元兵部則例館供事

喻贊猷號颺齋順義鄉舉人少嗜學竟夜書聲不輟及壯
領鄉薦見重於毛伯雨少宰嘗以聖賢事業相期許八
上公車不第卒於德州舟次士大夫聞者皆太息焉爲
人尙氣節嚴取與與友勸善規過有古君子風

李若瑤號嵩甫北鄉臨江人性靜穆寡言笑接人必以禮
父貢生廷黻家素封訓子綦嚴稍長命遊豫章鹿洞師
事名進士王韶學益進曹儷笙相國顧雲巖總憲視學
江右咸優獎之家構矩曾堂顧爲題跋有相士遍天下
未有如李子之度云云辛巳登賢書七上春官不第以
母老引退終日侍幃下母喪廬墓百日生平所焚借券

約千金代人償逋負至三千餘金故家中落有友某貸金六百歷廿餘年某已授知縣公車便道過訪得母金遽反其券時某別以千金囑寄其子卒無食言其信義大率類此子熙春候選從九品

善士

急公

陳品南堅南順義鄉地平人世有隱德父淡素公康熙丙申水災救數百人於洪濤中有某女獲免者品南兄弟養而嫁之乾隆歲饑平斛出賑且爲易穀反質事聞於邑侯嚴舉孝廉方正品南不就子姪六人清淮漢沂濫溶友愛一堂立家法十條又於邑中督修文廟宮墻城隍廟增豫寧書院膏火田畝倡修文峯塔葺祠宇修先塋興鄉學計費千餘緡淮性仁孝品南患風痺疾侍湯

藥十八年精靈樞素問之書捨藥以濟窮乏鄉里德之孫曾輩延階號龜軒品學端正能以詩書啓後賢治芳鴻善鴻幹鴻緒世泰世昌世綱俱補諸生鴻業大烈世暉俱國學生世璜舉孝廉之敬世馨成進士

舒九萬號凌峯長樂鄉人性孝友負幹才而慷慨好義每遇歲歉減穀值周恤里隣人咸仰重之省垣府學捐貲主修游藝堂庭階宏敞棟宇巍峩爲長樂鄉試館歲科試兩學師皆下榻其中教諭項珊有記見藝文又助修京都武邑試館且遺命輸租助賓興館貲遺田若金立鵬程文會類皆能見其遠且大者厥後孫曾捐建石堤倡修族譜而皆以九萬名注牒勒碑承先志也子五長文思次靜先贈承德郎三承志監生四濟川五承業監

生孫翼曾孫采等多策名上舍錦貢生泰職員桂馨以
恭庠生以長廩生鼎戶部主事傑卿雲 贈奉直大夫
九萬亦例得 馳贈奉直大夫

劉六成號藝圃北鄉百樓人天性純篤事父母以孝聞友
愛兄弟皓首怡怡躬儉勤起家逮晚年家日饒好施予
於本根之地尤厚鄉城祖祠不惜重金以助 學宮修
崇聖祠捐金勸之百樓爲吳楚通衢左右兩港木橋易
圯六成易之以石費二百緡子心廸授州同職心履貢
生心訓附貢生遵父遺命以父名捐正誼書院膏火錢
百緡 學宮後墻心履又捐金成之道光壬寅城內倡
修賓興館心廸子監生定芳心履子恩貢生定策郡增
生光策監生協職心訓子監生祖向等以六成名捐田
租三十石定芳子僑童馨樂又以父名捐租五石人咸
稱爲積善之家云

邱穗蘭號薌谷江陰鄉人有才識好善樂施楚人某貧迫
鬻妻券定代償所負賴以全遇鬻子者亦然明某葬父
母不吉困躓日甚以吉地扞之有鄧友物故子孤貧無
所倚代權其遺金俾成立嘗倡修南門邱祠建業山書
塾助修京都試館南昌試院本邑儒學頭門及盤山義
渡下柳至新開嶺橋路皆不惜多金仲子應鴻官西粵
江州州同等調滇南著有惠政人以爲父教之忠云

趙朝佐字秀元下南鄉人循例授州同職性冲和喜怒不
形精岐黃青烏之術施藥餌起人痼疾歲費二三十金
遇貧者喪葬爲審穴卜日或贈以棺他如建 文廟修

南昌試院增邑書院膏伙及儒學頭門南門義渡下柳石橋統費數百金同里蕭有聲嘗主其家塾見蕭父策杖而來以良馬贈之其慷慨如此子六人列膠庠貢成均者五邑貢生李蓋有序

李燭字履詳號坦菴長樂鄉楊州人少孤貧及壯家稍豐慷慨樂施遇歲歉減穀價以貸鄉里塗有餓殍買糲瘞焉尤關心文教府學建游藝堂爲本鄉試館燭樂輸重金襄成其事且囑其子曰吾邑書院傾頽膏伙不敷難以作養人材爾曹須留意焉道光四年子六人爲燭捐田租若干遵遺命也孫曾輩共傳詩禮游入膠庠宜食報於無窮云

葛昌園上南鄉羅溪人性渾厚以勤儉漸饒其家長子監生鄉飲介賓華祖磊落不爲俗囿弱冠善屬文屢試不售兼善醫藥貧而自損其貲者夥家藏不甚豐然能慷慨好義邑建正誼書院嘗以父名捐錢五十緡又偕二弟樂賓捐百金邑令陳秋河給有急公勸學額至於大小賓興會鄉文會家社學羅溪旌陽廟則率三弟監生懷珍胞姪耀庠捐輸約費六百餘金華祖之子三大倫鴻業俱監生鳳翹庠生懷珍之子四方蔚監生先青庠生

葉光緒字顯周光宗字慶雲上南鄉霞庄人俱太學生繼先世渾樸律身端方植品讀書不求進取豐財喜施道光辛卯歲饑里中穀俱糶盡慨然出錢四百緡採買米百有餘石減半價以濟貧乏邑令朱松齋雅重之其他

如建

文廟名宦祠楊梅山旌陽廟助正誼書院膏火捐大小賓
興會鄉文會沙港橋田租約費千貳百金尤篤於本原
嘗倡建祖祠主修家乘傾囊出九百餘金無所吝惜可
謂兄弟競爽矣今光緒之子朝梅邑庠朝棟朝幹光宗
之子世茂春暄邑庠鳳鳴監生亦俱有父風

葉貴號靜山昇仁鄉人乾隆癸卯武舉嘉慶丙辰選補塘
務府以親老不就善武技一時門下多所教成而故將
軍張大鵬尤著蹟封疆平生非公不履縣庭在鄉里遭
遇凍飢則推解以調之同族有葉光遠者攜家往陝耕
山厄於白蓮教匪僅其妻成氏負七歲孫生還僮僕無
依貴引至家與同衣食孫長爲之完娶成氏病故殯葬

如親又於郡邑書院文塔諸義舉罄囊攸助共五百餘
金次子潤芳增生三子逢年長孫翼鵬俱庠生

邢瑛江陰鄉南冲太學生家頗豐好行義族子弟有願讀
書而無力者爲築書屋捐田廿餘畝資之都文會有獻
腴產贍膏火者亦捐田四畝勸之佗如本境貧窶及時
不昏村丐老死暴骸不葬者遣遣出金成之施棺瘞之
其南冲往來山路自泉背迄鷺弓嶺修之長八里廣四
尺自東門坑迄沙頭裏嶺修之長二里廣四尺暨毀瓦
巷橋梁計費共千餘金宜夫鄉里道善之不置云子璫
登仕郎瑄玉華庠生潤山職員紹祖國學孫大魁占魁
庠生

車凌雲貢名運亨一字奇峯年豐南茶人有偉才嗜學任

義少失怙遵祖母徐命建石橋於境之東溪費金二百
嘉慶三年秋寧州白頭寇起西界有剝牀之患凌集勇
數百防堵七晝夜經都司鮑郡守蔡進兵平寇凌捐饗
餼耗金三百餘邑令王寰獎諭倍至 文廟大成石坊
乃父朝選合程雷二家所建也坊前地坪左右齊宮墻
角前抵街道凌伐石毀砌費錢百七十緡又倡祖祠勤
劬累年助金九百餘兩十七年大饑平價出穀千石復
買吳鎮穀四百餘共虧錢七百緡嗣因水涸難運仿古
方作度饑丸數萬全活甚衆與捐京邸會館邑賓興租
歲入之數斛置一圓木等則磨其錘有負值者焚券千
餘善治瘋丐者率饋以藥尤耽典籍建書巢數十楹藏
書三萬五千卷法帖五百餘本子秉淳郡庠生秉源副
貢生候選直隸州判秉和太學生

熊舉礪字稼東太學生昇仁鄉豐良人邑增生先幹之父
也幼讀書穎異旣冠爲窮乏故廢舉子業以勤苦漸饒
其家邑人聯賓興會慨然捐田租二十石其境窶人溺
女成俗乃於分娩時出粟二石錢二千助之撫育俟他
人抱養爲媳所費雖止八十餘千而厥俗頓變又憫古
塚化爲樵採牛羊爲鳩工封之碑之凡七百所有奇計
費二百餘金梓里見聞交相推重而其量鼓每石出則
潛增五升入則潛減五升且畏人知

楊春幹字廷棟號柱臣順義鄉崑溪人虛心善下不要聲
聞於時性澹泊而高堂之養必豐凡烹調不假手他人
親偶不暢卽下氣怡聲縱談古人逸行奇聞以博色笑

尤好施濟解衣推食貧不能婚葬者分金助之修理古
塋數十塚暮年諄諄以行善屬其子上舍拔元拔元承
父志施棺木百餘歲收租於斛內增木板一方約少半
升許糶則去之捐修清江義渡田一畝二分賓興會田
十一畝祖祠祭田五畝三分鄉文會田一畝又捐修城
工錢二百緡捐入正誼書院錢五十千文知縣陳給贈
急公勸學額孫紹馨庠生

李樹玉太學生字千仞一字桃隣年豐坪上人家非素封
嘉慶十七年緩征石穀二千四百閉關絕糶勢不可支
玉呈出谷四百餘石減千錢踵行者眾邑令陳贈額誼
敦賜受四門鳴鉦民心始定正學項副學王俱贈以額
又玉祖汝昌公向無祠宇玉獻蕪垆屋二進連基址在
內爲祖祠糧稅自當族人德之

余生字鏡蓮號近園下南鄉楊港人幼失怙事寡母以孝
聞貌岐嶷方額長髯異於儕俗精岐黃術邑令王劉許
陳及邑丞傅時相引重中年棄舉業爲古文章與張閏
榻友善閏榻主其家者十數年嘗攜其治病案於醫詩
慷慨好義於祖先爲尤甚捐資輯楊港余氏族譜甲乙
兩書考据精確又出數百金修城市祖祠聯祭會族眾
額情深類本於祠他如減飢歲穀值資京都會館吳鎮
公宇諸義舉俱能自損益人知縣陳韻石表其墓兵備
道費履升有傳見藝文

李之春長樂鄉監生字少泉號肅齋坦菴四子性孝友好
義樂施邑書院久圯承父命輸金一千四百緡改建且

於六房眾捐租外獻田若干以飲膏伙工既落成前任
陳雲章爲之記巡撫部院程以助興文教額獎之居瓜
源港口每水漲阻隔行者病涉之春捐田十貳畝修橋
以便往來其三子太學生元勳克承先志捐建社稷先
農壇於縣治北關外尤輸重金助修省城知府張彙詳
咨部議敘八品職銜鄉里榮之孫溶邑庠生潢監生

舒廷棟字讓谷廷弼字利谷皆太學生長樂鄉人兄弟最
友善儉勤共矢鄉里目爲二難而于邑公事不少咨初
縣署東南隅之文昌宮年久就傾廷棟兄弟請于官謀
所以妥神者較舊益數十椽而煥然一新前令陳雲章
有記見藝文其嗣貢生錦監生昇等重修魁星閣助修
縣城垣輸鄉學以金獻賓興以產皆遵遺命也若瓜源

洞口僧雲濤募化所修石磴歲壬寅傾圮則廷棟出養
膳銀率錦所重修也

余相號豫莊監生楫號濟巖從九職楊港人同遊張閏榻
門兄弟友愛順於父母讀書不求聞達然亦不類鄙夫
之涇涇父生多義舉相楫踵行之陳志出三百金輔修
又捐二百餘金贍正誼書院膏伙中丞嵩給有敦行翼
教額又齋百餘金倡立許旌陽廟於茗洲港以禦蛟患
並置田畝裕後庚寅大荒家廩既罄備多金採買平價
糶四十二都紳耆公贈親仁善隣額四十四都公贈均
價恤鄰額道光壬寅八鄉倡建賓興館相同楫子監生
宣誥以父生名捐田租二十石宣誥又以父楫名捐租
十餘石前令王師道優獎之

盛學烹號和齋仙桂坊學博元績子行四太學生性孝友
養繼母如所生兄弟五人怡怡一堂中歲以勤儉起家
好施濟而尤厚於一本叔兄某艱嗣遽爲買妾諸昆猶
子輩每赴試累橐以金公祠祭產經理有年無苟入祀
事以賴凡賑荒修井諸義舉計費數百金邑張閨榻前
輩有文集醫詩版寄江城子守正貧久不得歸烹延至
家昇以金贖歸之已而烹卒守正哭以文且爲作傳前
令林重其爲人親弔諸門贈正直可風額子詡嗣乃祖
官學博性淵穆矧喜書畫磊落有父風亦太學生

葛方拔字卜川號鶴岡南鄉羅溪人幼穎異初授句讀日
可千言及長爲文踔厲風發鄉先輩咸引重之遊庠後
旋食餼十三次鄉試不售遂戢影空山自二十六齡失

怙以讀書兼理室務事母能以孝養七昆季俱友愛雖
暮年每飲食必偕性喜施與其父鏡崖歲以棺木卹窮
賤之喪方拔踵而行之二十餘年不懈尤慨志本根甲
午歲商諸昆季倡捐田租三十石立文孝會合族利賴
年五十八病革又囑其子盛鑾獻腴田益兩學租十石
并勸其兄監生方泰姪盛錦各捐田租六石以爲在學
多年分應爾也歿之日定論臚之蓋真讀書者

劉承緒號響溪坊市太學生先世居昇仁承緒少時家赤
貧走依舊戚冷氏三前輩敬受教誨後遂以勤儉創業
幾於富有父邑庠某晚年隆孝養承緒構屋坊市而兄
弟仍居昇仁爲創田園廬舍無計不周鄉里咸稱道其
友愛之篤居室旣裕好行義舉如

聖宮圍垣正誼書院及社學膏火東關外沿溪石堤以至義渡義塚賑荒等項會計捐費不下千緡子翔龍增生次金誥太學生孫寶謙郡庠生次寅謙太學生

成潤芳字甫衡職員年豐木高人少貧鬻薪養母燃松爲燈及壯懋遷吳山家日振捐正誼書院賓興館文光祠租修木高源及大港口橋四處遠近義舉悉資之辛丑崇陽寇警文武吏聚木高命子試用從九鶴立孫監生鳳翹募勇二百備糧械防石良泰陽諸險耗金三百餘復命次子崇懋買穀千石減價平糶邑令王給胥賴以周額

